

JESUKRISTO VXYAAWA'JA'S KAAJIYU'JNI

1 ¹Naa txā'wē Dxus kaajiyu'jnisa' Jesukristo's, aça' Jesukristo' txā'sna selpisaatxku kaajiyu'jwa'jsa yu' naa ensu seena' yūuwa'ja's, kxajk Jesukristo' txā'sna selpisáa Juana's kaajiyu'j teex angela's kwe'we'jçxa. ²Txāa pa'gak Juana' Dxus yuwe isasa's we'we Jesukristo kaavxya'ja'the uyni's jxuka, txāasa īsxīinisame'. ³Naa pa'ga na'sna leeīsa' nxusmēe weçxana yaakxwa'jsata', aça' Dxus yuwe ayte na'wē fxi'jni' txā'sna leeiçte wēse'jsawa isasa yuhna sūhna yajkxçxa kxtey yuusa' weçxana yaakxwa'j ji'phta'. Txā'wēme' kīhwa seena' kxtey yuuwa'j ena' utxaaça'.

Dxus nasa siete ahte pkhaakhesatx weçxani

⁴Juan yaasesa adxthu fxi'ja' Asia kiwete Dxus luuçx siete ahte pkhaakhesawe'sxtxi weçxana. Dxus yakh ewçxáa mfxi'zewe. Txā' nyafxíiwa txāaíçxáak yu', sa' açxwa txāaíçxá', sa' txāaíçxáa bagaçxtewa nes yuuna. Sa' Dxus tasxte ūssa siete espíritusawe'sx pu'çxnitxwa mpa'gawe. ⁵Sa' txā'wēy Jesukristo pu'çxni'swa mpa'gawe. Txā' Dxus yuwe's jxuka pta'sxsa' txāak uuçxawa ki' itxī yuu nyafxte, sa' açxha' txāa jxkaajxa' ājāwa'jsa' naa kiwete jxkaahsawe'sxtxi. Kristo' kwe'sxtxi's peeygāhçxa kwe'sx pkaltxi's txajx eeju pkhi'kxku. ⁶Txā'wē yūuçxak kwe'sxtxi's jxkaahsa vxite' sacerdote vxitçxa nvxiht Dxusa's selpikahn. Sa' Kristo yuuçxáa kīhtewa jxuka ājāsa jxtuhthe yuuwa'jsa' bagaçxtewa.

⁷Txā'sa' mthegwe, tāaphte yuja'. Txā'sa' jxukaysa uyuutxna, txā'sna kpā'vxit-sawa. Sa' uyçxa' naa kiwete nasa jxukaysa ū'netxna. Isath we'we', txā'wē yuh yuutxna.

⁸Kwe'sxtxi nwe'wesa' ma'wē yūuwa'ja'swa ājāwa'jsa we'weçxa': Adxa' naa kiwe meetey ūsyā'th yu', sa' bagaçxtewa nes yuuwa'jsath pçuwa'jsamēe jī'k. Txā' nyafxíiwa txāak yu', sa' açxwa txāaíçxá', sa' txāaíçxáa bagaçxtewa nes yuuna.

Dxus Nçxi'k nasa yuusáa vxyaani

⁹Adxa' Juan i'kwe'sx yakthē'th. Txāasa i'kwe'sx na'wēy ja'daçxah pxthaa yuuwa'ja'swa jxpa'gasath, sa' Dxus jxkaahni ena'swa jxpa'gasath i'kwe'sx na'wēy. Sa' Jesukristo' kīhtewa wantāywa'ja's ūsku txā'snawa i'kwe'sx na'wēy jxpa'gasath. Nawa naasáa Dxus yuwe's Jesukristo kaajiyu'kh txā'sna pta'sxpa'ga yuuçxáa adxa' preesuth ūsu' kiwe Patmos yaasesa yu'pxāhte u'pu'k kxtee. ¹⁰Sa' teeçx ki'sen ente' Dxus Espiritu aphniith yuu, sa' adx e'ste trompeta's tukani na'wē seena' sus we'weni wēse'th. ¹¹Txā' na'jī'k:

—Kīh yuhwa meetey adxa' ūsyā'th yu', sa' bagaçxtewa nes yuuwa'jsath. Aça' idx uyuuçgu txāatxi's eçte fxi'jçxa mkaah Dxus luuçx siete ahte pkhaakhena ūssa Asia kiwetewe'sxtxi, Efxeso, Esmirna, Pérgamo, Tiatira, Sardis, Fxiladelfxia, Laodicea txāa çxhabtewe'sxtxi jīte', ¹²¿Kimki'k txā'wē we'we? sūhçxa yu'thegçxa', uythu bela txaahnisa sietetx ūsu' vxuyu behçxaçxáasa. ¹³Sa' txāa bela txaahnisa ksxavxyte Dxus Nçxi'k nasa yuusáa na'wēsak ūsu', ropa çxida vxīçte kīhsa athçxa, jxtudnisawa vxuyu behçxaçxáasa peçxute kāh tapesak jī'phu'. ¹⁴Sa' dxkhas yu' khas ew çxihme na'wētçx yu', meeçxawa yādçx na'wē çxihme. Sa' yafçx yu' ipx beesa na'wētçx yu', ¹⁵naapkaçxha' txajçx çxida yu', çama's ipxte aaçxa'jni na'wētçx zhiçxkwe kwentete'. Aça' txajçx we'weni yu' yu'wala seena' susni na'wēk pthūuse'. ¹⁶Txajçx kusete yu' siete estrelxatçku jī'phu', naapkaçxha' txajçx yuwesu yu' espada pdxi'p seena' zeksak sēhna ūsu'. Aça' txajçx dxi'p yu' sek kweethni na'wēk eena' khikhyna ūsu'. ¹⁷Aça' txā'wē uyçxa', txajçx tasxga uuní na'wēth wete. Nawa txajçx kuse paçuwe'sxa's adx kajkwete peekizeçxa na'jī'k:

—Ūukhnu, naa kiwe meetey adxa' ūsyā'th yu', sa' bagaçxtewa nes yuuwa'jsath pçuwa'jsamée. ¹⁸Uuçxawa ki' itxī yuusath. Uuwa'ja's peena yu' jī'phuya'mée adxthu knay, sa' uu kiwetewa kaafxī'ze'jme'nja, txāasa āçxha' bagaçxtewa itxīçxáa nes yuuwa'jsath. ¹⁹Na'wē idx uygu txāatxi' mfxi'j, āçxh uynisa ki' e'su vxite uyuune'ga txāatçwa. ²⁰Adx paçu kusete siete estrelxatç uygu vxite' bela txaahni sietesatç txā'wēsa' na'wē kaajiyu'jsata': Txāa estrelxa' Dxus luuçx siete ahte pkhaakhena ūssatç yu'wee pta'sxsa angeleswe'sxta', naapkaçxha' siete bela txaahnisa' Dxus luuçx siete ahte pkhaakhesawe'sxta' jī'k.

Efxeso çxhabtewe'sxtxi pta'sxni

2 ¹Dxus luuçx Efxeso çxhabtewe'sxtxi jxpe'jsa Dxus angela's mfxi'j na'jīna: Paçu kuseju siete estrelxatç atçxa siete bela txaahnisa vxuyu behçxaçxáata' txāa ksxavxysu u'jusa we'weçxa' na'jī'k: ²Dxus dxi'pte i'kwe'sx ma'wē fxi'zesatewa jxuka jiith. Wala yuh çxhāçxha mjīina wantāyna fxi'zesa i'kwe, sa' ewmeesa yuutxi'sa' jxpa'ga'çmée

i'kwe. Txã'wê Jesus jxkaahnisatha'w jîna pa'jsawe'sxtxi'sa' jxpa'gamée kintewa ew jiyuya' yuwe paapëyi'i'kwe, sa' txã'wê yûuçxa' Jesus jxkaahnisamée ãxîisatewa jiyu'i'kwe. ³Wahtxmée adxna selpiipa'ga wala pxthaa yuuna wantâyna mjîiwa'lj ji'phu'i'kwe txã'wê yûuni's adxa' jiith. ⁴Nawa i'kwe'sx âhmée yûuni's we'wewa'lj ji'pthu. Nyafxîi na'wê i'kwe wala peeygãawa'ja's ji'phu' txãa yu'sa' açxa' ji'phmée i'kwe. ⁵Txãa pa'ga kîhtene'kwe jxpuba txãa pkala's nvxihtçxa Dxus tasxte misxawedwe, sa' nyafxîi ma'wêne'kwe peeygãasa yu' txã'wêy myûuwe. Txã'wê yûumeete', tud yuwe'nja i'kwe'sxtxi kastigãyya', sa' i'kwe'sx ksxavxyu bela txaahni's jxûna u'jçxa vxite ahte txaja'nja, pkaltxi nvxihtçxa Dxus tasxte sxawedmeete'. ⁶Txã'wêçxawa na'wê yûuwa'lj yu'sa' ew i'kwe yû. Nikolaitawe'sx fxi'zeni yu'sa' açe'i'kwe txã'wêsa yu'sa' adxwa açe'th. ⁷Kxtey nwêese'jwa'jsa ûşçxa', mwêese'jwe Dxus Espiritu' na'wêk we'we' Dxus luuçxtxi: Dxus ûsnite fxtûu tasx ûsa' bagaçxte yuhwa peejxmée yûnna nes yuusa txã' uumée kaafxî'ze'jsa'. Txã'sa' puuç'u'nja ewmeesa yu'sa' nwêese'jmée jxuka knaysawe'sxtxi'sa' jî'k.

Esmirna çxhabtewe'sxtxi pta'sxni

⁸Dxus luuçx Esmirna çxhabtewe'sxtxi jxpe'jsa Dxus angela's na'jîna mfxi'lj: Naa kiwe meetey úsyã'kh yu' sa' bagaçxtewa nes yuuwa'jsa uuçxa ki' itxî yuuk txã' na'jî'k: ⁹Dxus dxi'pte i'kwe'sx ma'wê fxi'zesatewa jxuka jiith. I'kwe'sx pxthaa yuuna kîhwa ji'phmée fxi'zeni txã'wê yûuni's jiith. (Nawa ew yajkxte yu' wala ji'phsa i'kwe.) Sa' Dxus luuçx meeçxawa Dxus luuçxtha'w jîna weeçx we'wesatxwa jiith. Nawa txã'wê yûusa' eçxthê'j nasa yuuçxáata'. ¹⁰Pxthaa yuuwa'lj pa'jana txã'sa' ûukhmeene'kwe. Eçxthê'ja' i'kwe'sx maafîtxi's karcelte txajana, i'kwe'sx jxukaysa ma'wê yûutewa jiyuya'. Aça' diez enpkaçx wala pxthaa yuuwa'lj ji'phune'kwe. Nawa Dxus yakh txutemée mfxi'zewe uu entepkaçx, aç'a' adxa' itxî fxi'zewa'ja's úsu'nja txã'wê ew fxi'zepa'ga. ¹¹Kxtey nwêese'jwa'jsa ûşçxa', mwêese'jwe Dxus Espiritu' na'wêk we'we' Dxus luuçxtxi: Ewmeesa yu'sa' nwêese'jmée jxuka knaysawe'sxa' Dxus yakh bagaçxte yuhwa peena yu' puutx uywa'ljmeete yu' u'jmeetxna jî'k.

Pérgamo çxhabtewe'sxtxi pta'sxni

¹²Dxus luuçx Pérgamo çxhabtewe'sxtxi jxpe'jsa Dxus angela's na'jîna mfxi'lj: Espada pdxi'p zeksa's ji'phsa' na'jî'k: ¹³Dxus dxi'pte i'kwe'sx ma'wê fxi'zesatewa jxuka jiith. I'kwe'sxa' eçxthê'j jxkaahna úsni ksxavxyte úşçxawa, adx tasxu yu' txutemée i'kwe fxi'ze'. Adx kaapiya'jni's pta'sxsa Antipas nakwe wala seena' pxthaa i'kwe'sx ksxavxyte ikhni yuuk txãa enteçxáa yuhwa ûukhçxa adx yase's kxsusmée yu' yuumée i'kwe, kxteek eçxthê'j úsu' nawa. ¹⁴Txã'wêtewa i'kwe'sx âhmée yûuni's we'wewa'lj ji'pthu: Balaan kaapiya'jni's nwêese'jsawe'sxtxi

i'kwe'sxa' iipe'ji'kwe Pérgamo çxhabte. Txãa Balaana' Balakha's ewmeek yu'kxpeh Israelwe'sxtxi's kaypuba'khan, txãasak Dxus itxímeesatx weçxana tajkx ikhni çxiçxa's ü'kaah, sa' pkal kazx yuuna fxi'zewal'ja'swa kaapiya'kh. ¹⁵ Sa' Nikolaitawe'sx kaapiya'jni's nwëese'jsawe'sxtxiwa iipe'ji'kwe. Txã'wësa yuutxi's adxa' açe'th. ¹⁶ Txãa pa'ga pkala's nvxihtçxa Dxus tasxte misxawedwe. Txã'wëme' adxa' dud i'kwe'sx tasxna yuhçxa, txã'wë ewmée fxi'zesawe'sxtxi kastigaĩ'nja espada pdxi'p zeksa ji'pthu txãaju. ¹⁷ Kxtey nwëese'jwa'jsa üsçxa', mwëese'jwe Dxus Espiritu' na'wëk we'we' Dxus luuçxtxi: Ewmeesa yu'sa' nwëese'jmée jxuka knaysawe'sxtxi's üsu'nja maná ü'nisa jxaawni üsa' txã'sna. Sa' teeçx kwet çxihme üsu'nja, sa' txãa kwette yu' yase u'sesa's fxi'jni yuuna kim yuhwa jiyunimeesa naasáa txãa kweta's jxpa'gasa yuuçxáa jiyuna ji'k.

Tiatira çxhabtewe'sxtxi pta'sxni

¹⁸ Dxus luuçx Tiatira çxhabtewe'sxtxi jxpe'jsa Dxus angela's na'jina mfxi'j: Dxus Nçxi'k yafx ipx beeni na'wësa ji'phsa txajx çxida çam na'wë kwentetesa ji'phsa na'ji'k: ¹⁹ Dxus dxi'pte i'kwe'sx ma'wë fxi'zesatewa jxuka jiith. I'kwe'sx peeygãani, úuste jxpubamée Dxusa's yajkxna fxi'zeni, wa'lmée selpiina fxi'zeni txã'wë yüuni's jiith. Sa' nyafxí meeçxa' açxha' thaakwe mjüina üsi'kwe. ²⁰ Nawa i'kwe'sx ähmée yüuni's we'wewa'j ji'pthu: Txãa u'y Jezabela's ma'ji'çmée i'kwe, txãa u'ya' Dxus kwe'we'jni'sthu pta'sxi' jičxa adxna selpisaatx kaypuba'ja'kh pkal kazxsate kaafxi'ze'jna, sa' tajkx ikhçxa Dxus itxímeesatx weçxawa'ja' jīnak kaapiya'ja'. ²¹ Adxa' txãa u'ya's en üsthu txãa pkala's nvxihtçxa Dxus tasxte sxawedkahn. Nawa txã'wë yüuya' wa'lçxa txãa pkal kazxsateyçxáak fxi'ze'. ²² Txãa pa'ga adxa' txãa u'ya's kastigaĩ'nja, aça' txãa u'y kaapiya'jni's nvxihtmeeçxa', txãawe'sxwa seena' yuh pxthaa yuuwa'j ji'phutxna. ²³ Sa' txãa u'y luuçxtxi's ikhe'nja. Txã'wë yüute Dxus luuçxa' jxukaysa jiyutxna adxa' txãawe'sx üus dxiiju yaakxni's jxuka jiyusatewa. Sa' i'kwe'sx teeçxsa na'wëçxah kīh yüusatewa, ka'tuwa txã'wëy yu'nja. ²⁴ Nawa Tiatira çxhabte üssa maawa txãa u'y kaapiya'jni's nwëese'jsamée vxite' na'wë eçxthē'j kaapiya'jni kim yuhwa jiyunimeesa jī'tx txã'snawa nwëese'jsameewe'sxa' adx yu'kxpehwa'j peejxmeei'kwe. ²⁵ Nawa ew fxi'zewal'ja's peçxkananuwe adx sxawedpkaçx. ²⁶ Sa' ewmeesa yu'sa' nwëese'jmée kīhtewa jxuka knayçxa adx jxthāasniçxá's nmeh entepkaçx kxtey yuuna fxi'zesa yu'sa' nasa mteewe'sxtxiwa jxuka jxkaajxa' äjāwa'ja's üsu'nja, ²⁷ adx Tatawa ma'wëga adx jxkaajxa' äjāwa'ja's üs txã'wëy. Aça' nasa jxukaysatx seena' yuh juuna' yuuna jxkaajana, kiwee mitxh açxamée ewsa's ma'wëga ya'udu' txã'wëyçxáa yuuni yuutxna. ²⁸ Sa' khikhiiçte kãasa estrelxa'swa üsu'nja. ²⁹ Kxtey nwëese'jwa'jsa üsçxa', Dxus Espiritu' na'wëk we'we' Dxus luuçxtxi txã'sna mwëese'jwe jī'k.

Sardis çxhabtewe'sxtxi pta'sxni

3 ¹Dxus luuçx Sardis çxhabtewe'sxtxi jxpe'jsa Dxus angela's na'ljina mfxi'lj: Dxus tasxte üssa sietesatx jxkaahsa txajx kusete yu' siete estrelxatx atçxa üssa na'lj'k: Dxus dxi'pte i'kwe'sx ma'wë fxi'zesatewa jxuka jiith. İtxi üstha'w jina jxtuhthe i'kwe fxi'ze', nawa uuní na'wë üsi'kwe. ²Çxhâçxha fxi'zewa'ja's miiyajxwe. Txä'wëme!, Dxus yakh fxi'zewa'j yu'sa' kīhnawa jxuka ivxiituwa'theçxáa yā'j üsi'kwe. İiuythu Dxus dxi'pte i'kwe'sxa' ewmée i'kwe fxi'ze'. Pkala's nvxihtçxa Dxus tasxte misxawedwe. ³Sa' i'kwe'sxtxi ew kaapiya'jni's yajxççxa txä's yuuçxáana kxtey yuuna mfxi'zewe. Txä'wë jxp'a'yakxmeete!, adxa' kus peswée na'wëçxáa pa'ja'nja i'kwe'sx tasxte, kim yuhwa jiyunimeete. ⁴Txä'wëçxawa kxtee Sardis çxhabte maz nasa yu' athni ropa khüuçxhi'jnimeesatx ji'phi'kwe, aç'a' txäawe'sxa' adx yakh fxi'zetxna ropa çxihmesa athçxa, txäawe'sxa' txä'wë fxi'zewa'jsata!. ⁵Ewmeesa yu'sa' nwëese'jmée kīhtewa jxuka knaysawe'sxa' ropa çxihmesa kaathe'jni yuutxna. Aç'a' txäawe'sx yasetxi's khukhme'nja bagaçxte yuhwa uuwa'jmée itxi fxi'zewa'j libruju, wejxwa txäawe'sx yasetxi's pta'sxna kaajiyu'ju'nja adx Tata vxite! txajx angeleswe'sx dxi'pte. ⁶Kxtey nwëese'jwa'jsa üsçxa!, Dxus Espiritu' na'wëk we'we' Dxus luuçxtxi txä'sna mwëese'jwe jī'k.

Fxiladelfxia çxhabtewe'sxtxi pta'sxni

⁷Dxus luuçx Fxiladelfxia çxhabtewe'sxtxi jxpe'jsa Dxus angela's na'ljina mfxi'lj: Jxkaahsa Davxid İxavxi's ji'phsa txäa phadeyā'the', kim yuhwa apha'çme!, sa' txäa aphte!, kim yuhwa phade'çme' txä'wë isasa's pta'sxsa' na'lj'k: ⁸Dxus dxi'pte i'kwe'sx ma'wë fxi'zesatewa jxuka jiith. I'kwe'sx fxi'zewa'j dxi'ja's phadeçxa nvxihtthu txä'sa' kim yuhwa aphyā' äjāmeena. I'kwe'sxa' Dxus dxi'pte açxamée i'kwe çxhâçxha fxi'ze', nawa adx pta'sxni yu'sa' kxtey yuuna üsi'kwe adx yu'sa' ahçemée. ⁹Aç'a' txäa pa'ga i'kwe'sx tasxte peejxükwekahn kaja'nja eçxthē'j nasa judiumeeçxawa judiutha'w jina İsxüisawe'sxtxi, kxah txäawe'sxa' jiyutxna adxa' i'kwe'sxtxi's peeygāasatewa. ¹⁰Kīhtewa jxuka wantāywa'ja's adx jxkaahni's kxtey nwëese'ji'kwe, txäa pa'ga adxa' jxaawu'nja i'kwe'sxtxi's naa kiwete jxukaysawe'sx ma'wë yūutewa jiyuya' nxuswa'j en pa'jana naa kiwe uta txäa ente. ¹¹Txaçxmey sxawedu'nja. Ew fxi'zeni's mpa'yajxwe, kxah txä'wë fxi'zepa'ga i'kwe'sxtxi üswa'j üsa' txä'sna kim yuhwa kusa'jmeena. ¹²Ewmeesa yu'sa' nwëese'jmée kīhtewa jxuka knaysawe'sxtxi's adx Dxus tasxtewe'sx seena' çxhâçxhasa vxitu'nja, aç'a' bagaçxte yuhwa kasehmeetxna txäajū. Sa' txäawe'sx kakwete fxi'lçxa ki'pu'nja adx Dxus yase vxite! adx Dxus yujuni çxhab yase Jerusalem u'sesa cielutewe'sx txäatx. Sa' adx yase u'sesa'swa txäawe'sx kakwete yuu

fxi'jçxa ki'pu'nja. ¹³Kxtey nwëese'jwa'jsa üsçxa', Dxus Espiritu' na'wëk we'we' Dxus luuçxtxi txä'sna mwëese'jwe jī'k.

Laodicea çxhabtewe'sxtxi pta'sxni

¹⁴Dxus luuçx Laodicea çxhabtewe'sxtxi jxpe'jsa Dxus angela's na'jīna mfxi'j: İsxīsamée kīhtewa jxuka isasaçxá's we'wesa kīh yuhwa meetey üsyā'kh yu' txā' na'jī'k: ¹⁵Dxus dxi'pte i'kwe'sx ma'wē fxi'zesatewa adxa' jxuka jiith. Dxusa's üsuh jxuka yaakxpa'gamée fxizewa meei'kwe, sa' açxawa meei'kwe. Txā'wē yā'jçxa', jxukate fxize yuuwaç wejx ewna, meeçxawa açxa yuuni ewna. ¹⁶Nawa fxizewa meei'kwe, sa' açxawamée wejkuëçxáa bajxi'kwe, txāa pa'ga adx yuwējū i'kwe'sxtxi pugaya'wath. ¹⁷I'kwe'sxa' wala ji'phsaçxa kīh yuhwa peejxmée wala ewçxáa fxi'zena ūstha'w jī'i'kwe. Nawa kīh yuhwa ji'phmée sūpçxáa uyya' ājāmée nxuste wētmeete yuuçxáa fxi'zeni yu'sa' jiyumée ūsi'kwe. ¹⁸Txāa pa'gath na'wē yu'kxpeje': Wala ji'phsa yuu wēeçxa', adxa'sçxaçxáa mweywe vxyuu beh ew pheu'jnisa. Sūpçxáa fxi'zeya'mée athwa'j ropa çxihmesanawa mweywe. Sa' yafxtewe'sx yu'çewa mweywe. ¹⁹Adx peeygāanisatxi's juuna'th we'wena yu'kxpeje' jxukaysatx. Txā'wē Dxus yakh çxhāçxha fxi'zeya', pkala's nvxihtçxa Dxus tasxte misxawedwe. ²⁰Mwëese'jwe, adxa' vxitxte pa'yana ūsthu. Aça' maawa adx we'weni's wëse'jçxa ka'ga'the', kxtee u'kaçxa txāa yakh fxi'ze'nja, aça' txāawa adx yakh fxi'zena. ²¹Ewmeesa yu'sa' nwëese'jmée kīhtewa jxuka knaysawe'sxtxi's adx jxkaahna ūsnite ih ūswa'jsa vxitu'nja, adxwa ma'wētka ewmeesa's nwëese'jmée jxuka knayçxa adx Tata jxkaahna ūsni pukate kaçx txā'wēy. ²²Kxtey nwëese'jwa'jsa üsçxa', Dxus Espiritu' na'wëk we'we' Dxus luuçxtxi txä'sna mwëese'jwe jī'k.

Dxusa's cielute weçxana ūsni

4 ¹Txāa e'su' ki' thegçxa' uythu cielute vxitx phateçxa ūste. Aça' nyafxīi we'weni na'wēy we'weni ki' wëse'th trompeta's seena' sus tukani, sa' na'jī'k:

—Ay ēete myuh, kxtee kaavxya'ja'jya'wath naa e'su kīhçxa yuune'thewa txāatx.

²Txā'jīçpkaçxha' txāa dudtey Dxus Espiritu' aphniith yuuna pa'j, sa' uythu cielute jxkaahna ūsnisa's. ³Txāa jxkaahna ūsnite yu', teeçx kaçxçxa u'pu'k, sa' kxtee u'psa yu' iiméh seena' zhiçxkwe zmeena' kuh jwed khikhyna u'pu'k. Sa' txāa peeku'jsu yu' kxthūus iiméh zhiçxkwe kweethna ūsu'k. ⁴Txāa jxkaahna ūsni pukasu yu' vxite jxkaahna ūsni weintikuatro āhtx ūsu', aça' kxsū yu' Dxus luuçxtxi jxkaahsa weintikuatrosatx u'pu', ropa çxihme athçxa dxikthesu yu' vxyuu bee korona ji'phsa. ⁵Txāa jxkaahna ūsnijū yu', kpi'sx kweneni na'wēsak kasehna ūsu' seena' susna, sa' jxkaahna ūsni dxi'pte yu' siete ipx

pki'tanitx behna ũsu' txãa yu' Dxus tasxte ũssa siete espíritusawe'sxtxi yu'. ⁶Txãa dxi'p'teyçxáa mar na'wēsak zhiçxkwe khikhyna ũsu'.

Txãa jxkaahna ũsni pxãhsu vxite' peeku'jsu yu' Dxus vxitnisa ãtxĩsa pahztxi ũsu', kakwete jxuka yafxçxaçxáa ji'phsa. ⁷Txãa pahzsa nyafxtewe'sxa' león na'wēk yu'. E'stewe'sxa' tulu na'wēk yu'. Tekhtewe'sxa' nasa na'wēk dxi'p ji'phu'. Aça' pahzewe'sxa' uh na'wēk fxuusa yu'. ⁸Txãa Dxus vxitnisa pahzsa' teexçsa na'wēçxah seis fxu ku'tatx ji'phu', sa' yafxçxaçxáa kakwete jxukatx ji'phsa yu'. Txãawe'sxa' kus ma'k yuu en ma'k yuu nawa bagaçxte yuhwa wahtxmeetx na'jĩna ũsu':

Dxus iiméh seena' walasa,
Kĩh pkal yuhwa ji'phmée iiméh seena' atesa,
Nyafxíiwa txãak yu', sa' açxwa txãaíçxá',

Sa' txãaíçxáa bagaçxtewa nes yuuna jĩnatx we'wena nes yu'.

⁹Sa' kxtee jxkaahna ũsnite kaççxa bagaçxteçxáa yuhwa uumée nes yuuwa'jsa's Dxus vxitnisa txã'wē tuuthe'jna weçxaaçpkaçxha', ¹⁰Dxus luuçtxxi jxkaahsa weintikuatrosawe'sxa' bagaçxteçxáa yuhwa uumée nes yuuwa'jsa tasxte peexçxkweçxa txãawe'sx koronatx txajx tasxte ki'pçxa na'jĩnatx weçxana tuuthe'je':

¹¹Kwe'sx Dxus idx yuuçxáa jxpa'gawa'jsag weçxana tuuthe'jni's,
Txãa pa'gatey idxçxaçxáag kíhnawa jxuka vxit,
Aça' iidx peeygãhçxa taki'jnisaçxaçxáa ũsta' jĩ'tx.

Libru's phadewa'jsa

5 ¹Jxkaahna ũsnite kaççxa u'psa' paçu kuseju teeçx eç fxi'jnisa atçxa u'pteth uy. Txãa eç yu' ekaju dxiiju jxuka fxi'lçxa wala ew pelçxa siete selxo yakhku aphni yu'. ²Sa' teeçx angel iiméh seena' çxhãçxhasa ũste uythu, txãa yu' na'jĩnak paapēyi' sus we'wena:

—Txãa eç siete selxo yakh aphnisa's çkim sudeçxa phadeya' ajãkx? jĩ'k. ³Nawa cielutewe'sx, naa kiwetewe'sx, naa kiwe dxiijuwe'sx kimçxáa yuhwa txãa eça's phadeya' ajãwa'jsameetx yu', sa' thegya'çxáa yuhwa ajãwa'jsameetx yu'. ⁴Txã'wē txãa eça's phadeçxa thegya'çxáa yuhwa ajãwa'jsamée yuupa'ga, adxa' wala ũ'nena ũsu'th. ⁵Aça' kxtee jxkaahna ũssa teeçxsa' na'jĩ'k:

—Jwee yu' ũ'nenu. Teeçx ũsa' Juda nwe'sx, jxkaahsa Davxid ji'thewe'sx wala jxtuhthesa txã' ewmeesa's jxuka knayku, txãa siete selxotx sudeçxa eça's phadeya' ajãya' jĩ'k.

⁶Txajũ' jxkaahna ũsni pxãhte vxite' Dxus vxitni ãtxĩsa pahz ũsu'tx vxite' Dxus luuçtxxi jxkaahna ũssawe'sx txã'wēsawe'sx ksxavxyte Piisxakuē na'wēsa yujuçxa ũste uythu. Txãa yu' kpã'vxitçxa ikhni snxalwa ji'phu'k, sa' siete kaaçxu siete yafxku ji'phu'. Txãa siete yafx yu' na'wē Dxus tasxte ũssa siete espíritutx naa kiwete jxuka kaahni yuutx txãatx yu'.

⁷Txajū' txāa Piisxakuē jīnisa' u'jçxa jxpa'gak na'wē jxkaahna ūsnite u'psa' paçu kusete eç yaat yu'k txāa eçna. ⁸Txajū' txāa eça's jxpa'gaçpkaçxa', Dxus vxitni pahz itxīsa vxite' Dxus luuçtxti jxkaahsa weintikuatrosawe'sxa' peejxūkwetx txāa Piisxakuē jīnisa tasxte. Txāa jxkaahsawe'sxa' teeçxsa na'wēçxah tukani arpa ji'phu'tx, sa' vxyuu bee kopawa ji'phu'tx. Txāa vxyuu bee kopasū yu' dxuus yatte kabnisa inciensoçxaçxá's uta abnisa'stxi ji'phu'. Aça' txāa yu' Dxusa's peçxkanamée puutx we'wena ūsni jīnisak yu'. ⁹Sa' memtxi teeçx mem u'sesa na'jīna:

Idxa' txāa eça's jxpa'gaçxa selxotx sudeya' ājāwa'jsag,
Txāa pa'gatey ikhni yuuçxa iidx eeju kwe'sxtxi's weygu
Maa nasa ma'wēsa, yuwe ma'wē we'wesa, mteewe'sxwa jxuka Dxus
luuçx yuuya' ājākahn.

¹⁰ Sa' kwe'sxtxi's jxkaahwa'jsag vxitna pa'j vxite' sacerdote kwe'sx
Dxus tasxtewe'sx,

Aça' naa kiwete jxkaajxa' ājā'nja'w jī'tx.

¹¹ Txajū' ki' thegçxa' wēse'th angeleswe'sx iiméh seena' kuhsa we'weni's. Txāawe'sx yu' jxkaahna ūsni peeku'jsu vxite' Dxus vxitni itxīsa vxite' Dxus luuçtxti jxkaahna ūssawe'sx peeku'jsutx ūsu'. Txāawe'sxa' iiméh seena' wala kuh yu'tx. ¹² Sa' na'jīnatx sus we'we':

Piisxakuē na'wē ikhni yuunisa's bagaçxtewa pu'vxitumée weçxana
tuuthe'jna ūswa'ja'.

Sa' txāaçaçxáa jxuka jxpa'gawa'jsa', jxkaahsa yuuwa'j, wala seena'
ji'phsa yuuwa'j.

Kihtewa jxuka jiisa, iiméh çxhāçxhasa txā'wē yuuwa'jsa' jī'tx.

¹³ Sa' Dxus taki'jni cielutewe'sx, naa kiwetewe'sx, naa kiwe dxiijuwe'sx, martewe'sx kxtee kīhçxah ūstxna txā'wēsa jxuka na'jīna we'weni'swa wēse'th:

Weçxana tuuthe'jwa'ja' jxkaahna ūsnite kaçxçxa u'psa's vxite'
Piisxakuē na'wē ikhni yuuk txā'sna.

Sa' jxtuhthe jxkaajxa' ājāwa'jsa' bagaçxtewa jī'tx.

¹⁴ Aça' txā'jīçpkaçxa', Dxus vxitni itxīsa pahzsa':

—Txā'wē kxtey yuuna jī'tx. Naapkaçxha' Dxus luuçtxti jxkaahsa weintikuatrosawe'sxa' peejxūkweçxa weçxana tuuthe'je'tx bagaçxteçxáa yuhwa uumée nes yuuwa'jsa's.

Siete selxotx sudeni

6 ¹ Txajū' uythu Piisxakuē jīnisa' siete selxo nyafxtewe'sxa's sudeçte, sa' wēse'th Dxus vxitni itxīsa teeçxsa' seena' sus na'jīna:

—Yuhçxa mtheg jīni's. ² Aça' txā'wē wēse'jçxa', thegçxa uythu teeçx jiba çxihmesa's, kxtee a'jsa yu' kusete ūpanisa arko yaasesa'sku ji'phu'. Txajū' txā'sa' teeçx koronak ūsni yuu, aça' txāa yu' kihtewa jxuka puiiya' jīisak kaseh, mteewa puiiçxa knaywa'jsa.

³Txajū' Piisxakuē jīnisa' vxite selxo's sudek e'stewe'sxna, aça' wēse'th Dxus vxitni itxīsa e'zsatewe'sx na'ljīna:

—Mtheg jīni's. ⁴Sa' uythu vxite jiba behsa kasejeçte, aça' kxtee a'jsa yu's jxkaahnik yuu, naa kiwete wēt fxi'zeni's ivxiitute nasaa pwe'sx puutx ikhna u'khan. Sa' teeçx espada walasak ūsni yuu.

⁵Txajū' Piisxakuē jīnisa' vxite selxo's sudek tekhtewe'sxna, aça' wēse'th Dxus vxitni itxīsa tekhsatewe'sx na'ljīna:

—Mtheg jīni's. Aça' uythu vxite jiba khūçxa's aça' kxtee a'jsa yu' kusete isanisa balansa yaasesa'sku ji'phu'. ⁶Sa' wēse'th Dxus vxitni itxīsa ksxavxyu teeçx na'ljīna we'weni's:

—E'z libra skuutxhçxáana teen mjīinite āhpa'ga txweywa'l jyuuna, sa' seis libra cebada'swa txakwey pa'gate txweywa'l jyuuna. Nawa aceite vxino txā'wēsa yuutxi'sa' ivxiitupu'n jī'k.

⁷Txajū' Piisxakuē jīnisa' vxite selxo's sudek pahztewe'sxna, aça' wēse'th Dxus vxitni itxīsa pahzsatewe'sx na'ljīna:

—Mtheg jīni's. ⁸Aça' txā'wē wēse'jçxa' thegçxa uythu teeçx jiba seena' ūukhūkhsa's, aça' kxtee a'jsa yu' Ikhsa jīna kxsusni yasek ji'phu'. Naapkaçxha' txāa e'ste' uusaawe'sx yujuni jīnisak vxyaa. Txāa jibate a'jsa yu'sa' jxkaahnik yuu naa kiwete nasatx puupxāhn āatuw ikhkahn gweçxa vxitçxa wējē kaapa'ja'lçxa weewa txā'wēy kaapa'ja'lçxa yu'kh eçx juuna'sawa kaapena'lçxa.

⁹Txajū' Piisxakuē jīnisa' vxite selxo's sudek tahçtewe'sxna. Aça' Kristo's selpiipa'ga ikhni yuutx txāawe'sxçxaçxáa altal tasxte ūsteth uy. ¹⁰Sa' txāawe'sxa' na'ljīnatx sus we'we':

—Kwe'sxtxi jxpe'lja atesa idxa' kīhtewa kxtey yuusáa çmakwe txaçx jxthēeyuuya'waga, kwe'sxtxi ahçeçxa ikhtxi txāawe'sxtxi kastigāyya' jīte', ¹¹pasçxa':

—Āçxhí yu' ūuçxkwe uythāsna jxkaasena meswe, Kristo's selpiipa'ga i'kwe'sx na'wēy ikhni yuuwa'l j pēejxta' txāawe'sxtxi kxtey yuuna jxā'phkaçx jīçxa', ropa çxihmesatx kaathe'ljni yuu.

¹²Txajū' Piisxakuē jīnisa' vxite selxo's sudek seistewe'sxna. Aça' uythu seena' ehd u'ljweçte seka' jxuka khūçx kájk kweethmeepkaçx, a'tewa jxuka ee na'wēk beh yuu. ¹³Naapkaçxha' cielute estrelxa' ūsxitx naa kiwete, fxtū yūnwa ma'wēta wejxa çxhāçxha kēese'the jxuka ūsxi' txā'wēttx yuu. ¹⁴Aça' cielu' eç na'wē jxuka pelni yuuçxa vxyaame'. Naapkaçxha' thāl j vxiç vxite' ikh pxāhsu kiwe u'psa jxuka upenitx yuu ēse'sete. ¹⁵Aça' naa kiwete jxkaahsawe'sxa' wala ūukhçxa kiwe kafxsu vxite' kwet kafxsu jxuka jxsūuthtxi, walasawe'sx, ji'phsawe'sx, npiičthē'jwe'sx, jxtuhthesawe'sx, vxite' patron kusete selpiina fxi'zesawe'sx vxite' patron ji'phmēe wēt fxi'zesawe'sx jxukatx txā'wē yūu. ¹⁶Sa' txā'wē yūuçxa thāl j vxiç vxite' kwet penxatx na'ljīnatx we'we':

—Kwe'sxtxi jxuka akaaçxçxa kaavxya'ja'ljnu na'wē jxkaahna u'pa' txajx dxi'pte, vxite' Piisxakuē jīnisa seena' yuh kastigāyya' ūsa' txā'wēsa

dxi'pte. ¹⁷Txã'wëme', txã'wë seena' kastigãywa'j en ãjk, aç'a' çkim kxte' wantãyya' ãjãkx? jĩ'tx.

Israelita ji'jwe'sx iisawa'jniitx yuu

7 ¹Txãa e'su' pahz angeleswe'sxtxith uy, txãawe'sxa' naa kiwe peeku'the puutx pahz ahtetx yujuçxa üsu', naa kiwete pahz ajü wejxa kasehsatx ka'ga'jmée yupna, naa kiwete, marte, yu'khsu mtee yuhwa wejxakahmen. ²Sa' vxite angel uythu txãa yu' sek kãani ju'guk yuh yu', Dxus itxãsa selxo's atçxa. Txãa Dxus angela' susku we'we pahz angeleswe'sx üsu'tx naa kiwe vxite' mar txãatx suwwa'jsatx na'jina:

³—Naa kiwe, mar, yu'kh mtee yuhwa açxhíi yu' suwnuwe, Dxusna selpisaawe'sx dxikthesu kwe'sx iisawa'jmeyna yu' jĩ'k.

⁴Txajü' wëse'th Israelita ji'jwe'sx iisawa'jnisa jxuka yu' ciento kuarenta y quatro miltxi yu'. ⁵Judá ji'j, doce mil; Rubén ji'j, doce mil; Gad ji'j, doce mil; ⁶Aser ji'j, doce mil; Nefxtalí ji'j, doce mil; Manasés ji'j, doce mil; ⁷Simeón ji'j, doce mil; Levxí ji'j, doce mil; Isakar ji'j, doce mil; ⁸Zabulón ji'j, doce mil; José ji'j, doce mil; Benjamín ji'j, doce mil; txãawe'sxtxi jxukaçxah yu' txazkuëe yu'.

Maa nasawa Dxus nwe'wenisawe'sx

⁹Txãa e'su' ki' thegçxa' nasa iiméh wala kuh uythu. Txãawe'sxa' maa nasa ma'wësa majüwe'sxwa jxukatx yu', yuwe fxiyfxiyçxah we'wesa. Sa' Piisakuë jĩnisa jxkaahna u'pni peeku'jsutx yujuçxa üsu'. Txãawe'sxtxi' kim yuhwa isaya' ãjãmeeta', iiméh wala kuh yu'tx txãa pa'ga. Sa' ropa çxihmesa athçxa kusesu yu' lamus eçnatx yaat yu'. ¹⁰Txãawe'sx jxukaysa na'jĩnatx sus we'we':

Kwe'sx Dxus jxkaahna u'pa' vxite' Piisakuë jĩnisa txãawe'sx yuuçxáatx ewte neeyüuwa'ja's üs jĩ'tx.

¹¹Aça' Dxus jxkaahna üsni peeku'jsu vxite' Dxus luuçxtxi jxkaahsawe'sx peeku'jsu vxite' Dxus vxitni itxãsa pahz üsu'tx txãa peeku'jsu angeleswe'sx yujuçxa üssa' jxkaahna üsni ju'gu kiwete pa'j kiiçhuçxa Dxusa's na'jĩnatx neewe'we':

¹²Weçxana tuuthe'jwa'ja' kwe'sx Dxusa's.

Txãaçxáa kĩhtewa jxuka jiisa'.

Txã' bagaçxtewa çxhãçxhasa jxtuhthe jxkaajxa' ãjãwa'jsa' jĩ'tx.

¹³Txajü' Dxus luuçxtxi jxkaahsa teeçxsa' na'jĩnak adxa's pëjx:

—Na'wë ropa çxihme athçxa üsta' txãawe'sxa' çkimtxna, sa' majü yuusatxna? jĩte':

¹⁴—Txãawe'sxtxi' idxíiçxáa jiine'ga jĩnath pas. Aç'a' txã' na'wëk pta'sx:

—Txãawe'sxa' iiméh seena' wala nxuste skhëwsaata', sa' txãawe'sx athni ropatxi's thethçxa Piisakuë jĩnisa ikhni yuuk txajx eete yaatesata'.

¹⁵Txãasa Dxus jxkaahna üsni tasxte üsta', en ma'k yuu meeçxa' kus ma'k

yuu nawa bagaçxtewa selpiina nes yuuwa'jsata'. Aça' kxtee jxkaahna u'psa yakh ũssa' kīhte yuhwa peejxmée fxi'zetzna. ¹⁶Txāa pa'ga txāawe'sxa' āçxha' pxthaa yuumeetxna wēena yū'wēena. Sa' sektewa çxhavxyna yaaçxana fxi'zemeetxna, ¹⁷txāa pa'gately Piisxakuē jīnisa jxkaahna ũsni ksxavxyte ũsa' txajx jxpe'jni yuutxna. Sa' yu' bagaçxte yuhwa pçuwa'jmeesa's yusni yuutxna. Aça' Dxusí txāawe'sx ũ'neni yafx yu'txi's khukhuna jī'k.

Selxo sietetewe'sxa's sudeni

8 ¹Txajū' txāa Piisxakuē jīnisa' vxite selxo's sudek sietetewe'sxna. Naapkaçxha' cielute kīh yuhwa susmée sxuuna'k yuu, media ora āhpkaçx. ²Txā'wē yūuni skhēwniijū' siete angeleswe'sxtxi uythu Dxus tasxte yujuçxa ũste, aça' txāawe'sxtxi'sa' jxukaysatx tukani trompeta ũsnitx yuu. ³Txā'wē yuuçpkaçxha' Dxus angel vxite kūjk vxyuu bee kop'a's atçxa, sa' altal tasxtek yuju. Aça' seena' wala ũsni yuuk txāa vxyuu bee kopate abçxa kabwa'ja's. Txāa yu'sa' vxyuu bee altal ũsu'k jxkaahna ũsni tasxte kxtee kabwa'kh yuu, Dxus luuçx jxukaysawe'sx Dxus yakh puutx we'weçpkaçxha' kabkahn. ⁴Aça' Dxus angel txā'wē kabte', txāa ah yu' Dxus tasxte pa'kh tejka, Dxus luuçx jxukaysawe'sx Dxus yakh puutx we'weni yā'jçxa. ⁵Txajū' txāa Dxus angela' txāa vxyuu bee kopate utak çxhā'çxha ipx jī'phsa's āsx kxtee altaltewe'sxna, sa' txā'wē yūuçxak kiwe kajkwesu ēesu yahta. Aça' txā'wē yuuçpkaçxha', kpi'sx seena' kwehnena sus we'wena, ehdwa txā'wēk seena' u'j.

Siete angeleswe'sx trompetatx tujkaya' yujuni

⁶Txajū' txāa siete angeleswe'sxa' trompetatx tujkaya' yujutx.

⁷Aça' Dxus angel nyafxtewe'sxa' txajx trompeta's tujkak, naapkaçxha' naa kiwete kwetuba āsxku ee ka'dnisa vxite' ipx yā'jçxa. Aça' naa kiwe pxāhn āatuwku çxhavxy, yu'khwa txā'wēy jxuka.

⁸Txajū' Dxus angel e'ztewe'sxwa txajx trompeta's tujkak, naapkaçxha' thā'j vxiç wala na'wēsa ipxçxaçxáak behna ũsu' txā'snak marte akhni yuu. Txā'wē yuute', mara' pxāhn āatuwku eeçxaçxáa yuu. ⁹Aça' kxtee kīhçxah ne'ta itxīsa ũsu' txāa yu' jxuka uutx mar eeçxaçxáa yuunisatewe'sx yu'. Aça' barkowa pxāhn āatuwtxi vxitu.

¹⁰Txajū' Dxus angel tekhtewe'sxwa txajx trompeta's tujkak, naapkaçxha' cieluju teeçx estrelxa seena' walasa wetek ipxçxaçxáa behna. Yu'walasu vxite' yu'le'çxkuēsuwa naa kiwete pxāhn āatuwku pēethenna wete. ¹¹Txāa estrelxa' Seenā' Yaasak yaase yu', aça' naa kiwete pxāhn āatuwtxi yu'a' yaasaçxaçxáa yuu. Aça' nasa' seena' wala uutx, txā'wē yu' yaasaçxaçxáa yuupa'ga tudxya' ājāmeeçxa.

¹²Txajū' Dxus angel pahztewe'sxwa txajx trompeta's tujkak, naapkaçxha' sekwa puupxāhn āatuwku kweethmée neeyūu. Aça' a'te,

estrelxawa txã'wëyçxáatx puupxãhn ãatuw kweethmée neeyũu. Aça' txãa suwenisa yu' kweethmeeta'. Aça' en yu' wejkuẽ yuuçxáak khikhyna neeyũu, naapkaçxha' kus yu' jweeíçxáak seena' çxhi'dxsa yuu.

¹³Txajũ' thegçxa' uythu Dxus angel cielusu fxuhna u'jweçte seena' sus we'wena na'jina:

—Dxus angel tekhsawe'sx trompeta's tukani susuçpkaçxha', seena' yuh ùukhũukhsa yuuna naa kiwete ùssa yakha' jĩ'k.

9 ¹Txajũ' Dxus angel taçtewe'sxwa txajx trompeta's tujkak, naapkaçxha' uythu cieluju estrelxa naa kiwete weteçte. Aça' txãa wetesa estrelxa's lxavxi's ùsnik yuu, kafx seena' dxiisatewe'sxna. ²Txajũ' txãa kafx seena' dxiisa's phadek, naapkaçxha' orno walate ah na'wëk kaseh, sa' txãa aja' jxuka nuyçxhi'dxku sekna vxite' ãesu jxuka. ³Txãa ahte yu' khã'sxtxi kaseh naa kiwete jxuka fxuhna. Aça' txãa khã'sx yu' yãjaya' ãjãwaj'satx yu', usmitx ma'wëta aka yãja' txã'wë. ⁴Nawa naa kiwete fxtũ tasx, jxũth tasx çëysa yu'sa' kĩh yuhnawa suwwa'jsameetx yu', naasáa Dxus selxo's dxikthesu maa yuhwa ji'phmeesaçxaxá'stxi yãjawa'jsa yu'. ⁵Nawa nasatx ikhwa'jsa yu' yu'çmeeta', naasáa taç a'te ãhpkax seena' wala kaaka'jwa'jsaçxáatx yu'. Sa' txãa akasa yu' usmitx yãjani na'wë seena' aka yuuwa'jsatx yu'. ⁶Txãa ensu' nasa' uuwa'ja's pakweçxawa, uymeetxna. Makwe uuwa'ja's pakwetewa, txãawe'sxtxi' uu en pa'jmeena.

⁷Txãa khã'sxa' jibatx gweçxate puiya' u'jweççxa pheu'jnisa na'wëtx yu'. Dxikthesu yu' vxyuu bee korona na'wësatx ji'phu', sa' dxi'pa' nasaa dxi'p na'wëtx yu'. ⁸U'y na'wëtx ya'iidxkhas yu', sa' txãawe'sx ki'tha' león ki'th na'wësatx ji'phu'. ⁹Txãawe'sx kakwe yu' çam na'wësaçxaxá'stxi ya'iiphuph yu', sa' txãawe'sx fxujaçte susni yu' kaçxetilxa jiba wezxnisa kuhsa u'jweççxa ma'wë susukx txã'wëtx susu'. ¹⁰Sa' txãawe'sx mez yu' usmitx mez na'wëtx yãjawa'j ji'phu', nasatx yãjaçxa taç a'te uta kaaka'jwa'jsa. ¹¹Txãa khã'sxa' teeçx ne'jwe'sx ji'phu'tx, kafx seena' dxiite ùssa. Txãa ne'jwe'sxa' hebreo yuwete yu' Abadonku yaase yu', sa' griego yuwete' Apolionku yaase yu' meeçxawa Ivxiitusa jĩnisa.

¹²Txajũ' Juan we'weçxa':

—Nyafxte seena' ùukhũukhsa yu' skhëwku, nawa e'zĩ peejxta' jĩ'k.

¹³Txajũ' Dxus angel seistewe'sxwa txajx trompeta's tujkak, naapkaçxha' Dxus tasxte vxyuu bee altal pahz vxiçsu we'weni pthũusek. ¹⁴Sa' Dxus angel seistewe'sx trompeta' ji'phu'k txã'sa' na'jĩnak jxkaahni yuu:

—Pahz angeleswe'sx tudni ùsta' Eufxrates yu'wala pukate txãawe'sxtxi' mitxhwete jĩna.

¹⁵Txajũ' txãa angeleswe'sxtxi'sa' txhwetenitx yuu, nasa naa kiwetewe'sxtxi puupxãhn ãatuw ikhkahn. Txã'wë yũuwa'jsa ne'ta pheu'jni ùsu, kĩh ora, maa ente, kĩh a'te, maa anxute txã'wë yuuwa'jsaçxawa txãa en ãhtewe'sx. ¹⁶Txajũ' txãa jiba seena'su a'jsatx jiyuth. Txãawe'sxa' seena' wala kuh yu'tx, dos cientos milxones.

¹⁷Na'wē jiba seena'satx uythu, aç'a' txāa jibate a'jsa yu' puiwa'j txāawe'sx peçxusu ya'phuphnisa ji'phu'tx tekh jwed, teeçxsa' beh, vxite' çëy, vxite' lemsa. Aç'a' jiba yu' león na'wēt̄x ya'iidxiktheh yu', sa' yuwesu yu' ipx vxite' ah vxite' asufxre txā'wēs̄atx kasehna ūsu'. ¹⁸Aç'a' naa kiwete nasa puupxāhn ātuwtxi uu, txā'wē jiba yuwesu tekh jwed kasehçxa ikhpa'ga. ¹⁹Txāa jiba' yuweju vxite' mezuhtx ewmée yūuwa'ja's ji'phu'. Txāawe'sx meza' ul na'wēt̄x yu' dxikthé ji'ph, txāasatx txāaju ikhya' ājā'.

²⁰Nawa txāa ewmeesa vxyaatx txāate uusaamée nasa yu' txāawe'sx ewmée yūuna fxi'zeni's nvxihtmeeta'. Eçxthē'j jxkaahni'swa peçxkanamée nwēese'jna nestxi yu'. Sa' vxyuu beh, vxyuu çxihme, çam, kwet, fxtū, txāatxtxi nasa na'wē piisaçxa neewe'wena nes yu'. Txāa piisanisa' uysaawameeta', sa' wēse'jsawameeta', u'juya'wa āja'çmeeta'. ²¹Sa' ikhna fxi'zeni'swa nvxihtmeeta', sa' dxixuuna, kazx pkal yuuna, pesweena txā'wē yūunisatxwa nvxihtmeeta'.

Dxus angel kusete libru ji'phsa

10 ¹Txajū' Dxus angel vxite uythu seena' çxhāçxhasa cieluju tāaph pxāhte kijaçte, sa' dxikthete yu' kxthūusku ji'phu'. Txajx dxi'pa' sek na'wēk kweethe', sa' txajx çxida yu' ipx na'wēçxaçxāatx yu'. ²Kusete yu' libru le'çxkwesa'sku phadeçxa ji'phu', sa' paçu çxidaju yu' martek yuju, sa' jebu çxidaju' kiwetek yuju. ³Txā'wē yūuçxak sus we'we león pebeeçxa ma'wē sus seena' pebeekx txā'wē. Sa' txā'wē seena' pebeeçpkaçxa', siete kpi'sx we'wenik pthūuse. ⁴Txā'wē siete kpi'sx we'weni's jiyuçxa', fxi'jya'wath yu'. Nawa cielujū na'jīna we'weni'sthu wēse'j:

—Txāa siete kpi'sx we'wenitx jiyug txāatxi's kim yuhtxwa pta'sxna fxi'jnu jī'k.

⁵Txājū' txāa Dxus angel marte vxite' kiwete yujuçxa ūssa' paçu kuse's cielute kiisçxa ⁶jurāyku bagaçxte yuhwa uumée it̄xī fxi'zewa'jsa na'wē kijkihtxwa jxuka vxitku txajx yase's kxsusçxa na'jīna:

—Āçxha' jwee yu' jxthēyuumēna. ⁷Dxus angel sietetewe'sx txajx trompeta's tujkaya' takheçpkaçxa', nmeh ente ma'wē yūuwa'ja's ne' Dxusa' pheu'jçxa ji'phu' txā' jxuka kxtey yuuna. Sa' Dxus yuwe's pta'sxna selpisaawe'sxtxi ma'wēne' pta'sx txāa yu' jxuka kxtey yuuna jīk.

⁸Cielujū we'weçxa' eçte kuçx fxi'jnu jīk txā' ki' we'wek adx yakh na'jīna:

—Dxus angel na'wē paçu çxida's marte txahçxa vxite çxida's kiwete txahçxa ūssa' kusete libru ji'pha' txāa libru's jxpa'gaya' me'j jīte', ⁹Dxus angel tasxte utxaaçxa txāa libru's pējxthu. Aç'a' na'jīnak pta'sx:

—Jxpa'gaçxa mē'. Nawa iidx yuwete yu' mil na'wē nxusxa pēethejena, naapkaçxa' iidx tutxhte yu', wala seena' yajana jī'k.

¹⁰Txājū' Dxus angel kuseju jxpa'gaçxa libru's ū'th, aç'a' adx yuwete yu' mil na'wēk nxusxa pēetheeh, nawa adx tutxhte yu' seena' wala yaak.

¹¹Txājū' na'jīnak jxkaah adxa's:

—Na'wē Dxus kaajiyu'kh txā'sa' pta'sxya' ki' u'jwene'ga, çxhaab iisa, nasa msuuwe'sxwa, fxiyfxiy we'wesa, jxkaahsawe'sx txā'wēsatsx jī'k.

E'z piçthē'j Dxus yuwe's pta'sxya' kaahnisa

11 ¹Txajū' isani khīh ūsçxa na'wēk jxkaah:
—Dxuus yat vxite' altal txāa makwetewa jiyuya' miisa, sa' Dxusna neewe'weya' kxtee u'kasa maazkuēetewa jiyuya' miisa. ²Nawa Dxus yatte patxu ekajuwe'sx yu'sa' isanu. Txā'wēme' txajuwe'sxa's vxite nasatxku ūsni yuu, aça' txāawe'sxa' jxuka suwuutxna Dxus çxhab atesa's kuarenta y dos a'te āhpkaçx. ³Naapkaçxha' adxna selpisáa e'z kaja'nja, adx yuwe's mil doscientos sesenta en āhpkaçx pta'sxna ūskahn. Txāawe'sxa' nasa uute nxusna athnisa ropa khūçxsa jī'ph yuutxna.

⁴Txāa e'zsawe'sxa' e'z oliwo fxtū tasx ūsu'tx txā'wēsata', vxite' bela txaahni e'z ūsu'tx naa kiwete Dxus tasxte txā'wēsafiçxáata'.

⁵Txāawe'sxtxi' maafi yu' pkxuu wējēwáatxna, nawa txāawe'sx yuwesu ipx kasehçxa jxuka kabuna açesawe'sxtxi's. Aça' txā'wē yūute', maawa pkxuu wēesa' uu en jī'phutxna. ⁶Aça' txāa selpisaawe'sxa' cielu's aphyá' ājāwaj'sata', Dxus yuwe's pta'sxwa'j en pçuupkaçx nus pa'khamen. Sa' yu'a'swa eeçxaçxáa vxit-ya' ājāçxa seena' wala kxūusu'jwa'jsata' naa kiwete kīh weewa nuypa'jna, txāawe'sxtxi ma'wē yūuweçxtewa txā'wē yūutxna.

⁷Nawa txāawe'sx mjīa's jxā'jaçpkaçxha', eçx iiméh seena'sa kafx seena' dxijjū kāhçxa txāawe'sxtxi puiiçxa knayçxa ikhena. ⁸Txāawe'sx uuní kakwe's na'wē kwe'sxtxi jxpe'jsa kluuste uuk txāa çxhab wala klxiikhunsu wāataani yuutxna. Txāa çxhaba's Sodoma vxite' Egipto na'wēsa' jī'tx. ⁹Aça' tekh en ēepxāh āhpkaçx nasa maa çxhabuwe'sx, ma'wēsa fxiyfxiy we'wesa, maa kiwejuwe'sxwa jxukasa txāa uuní kakwetxi's uyuutxna, nawa kaapeda'j yu' meetxna.

¹⁰Txajū' nasa naa kiwetewe'sxa' seena' wala weçxaatxna txā'wē uupa'ga, sa' txā'wē weçxaweete txāawe'sx jī'phuni's puutx peesutxna. Txāawe'sx yakh yu' iiméh seena' wala ewmeesa na'wēsa yuutxna txāa e'z piçthē'jsa Dxus yuwe's pta'sxna ūssawe'sxa', txāa pa'ga uute' wala weçxaatxna. ¹¹Nawa uuní tekh en ēepxāh skhēwnijū', Dxusa' itxī vxitku aça' ki' kiitex. Txā'wē yūute', iiméh seena' wala ūukhtxi jxukaysa uyna ūssawe'sxa'. ¹²Txajū' txāa e'z selpisaawe'sxa' wēse'jtx seena' sus we'weni cielujū na'ljīna:

—Ayte cielute ēete myuhwe jīçpkaçxha', tāaph pxāhte u'jçxa cielute tejkatx, txāawe'sxtxi açesawe'sx uyna ūste. ¹³Txā'wē yuucpkaçxha', seena' wala ehd u'jçxa txāa çxhaba's ma'wē yu' suwçxa ejx jxūna u'kh, aça' siete mil nasatx uu txāa ehd u'pha'ga. Txā'wē yūute', nasa neeyūusa' iiméh seena' wala ūukhçxa Dxus cielute ūssa's pxthaa we'wena tuuthe'jtx.

¹⁴Txajū' Juan we'weçxa': Seena' ūukhūukhsa e'ztewe'sx yu' skhēwku, nawa jxthēyuumeena tekhtewe'sxwa jī'k.

Trompeta sietetewe'sx

¹⁵Txajü' Dxus angel sietetewe'sxwa txajx trompeta's tujkak, açá' seena' sus we'wenisa pthüuse'tx cielujü na'jîna:

Naa kiwete jxkaahna üsnisa' jxuka kwe'sx Tata vxite' txajx
Txhixhnisa Kristo txāawe'sx jiiçxaçxáatx yuuna pa'j.

Açá' açxha' txāaçaçxáa jxkaajana bagaçxtewa jinatx we'we.

¹⁶Txajü' Dxus luuçxtxi jxkaahsa weintikuatrosawe'sx Dxus jxkaahna üsnite üssa' kiwete kiiçhuçxa Dxusa's neewe'wetx na'jîna:

¹⁷Kwe'sxtxi jxpe'jsa idxa's weçxa'tha'w, Dxus iiméh seena' walasag.

Idxa' nyafxíiwa idxíiçxáag yu', sa' açxwa txāafiçxáag, sa' bagaçxtewa
idx yuuçxáa nes yuuwaj'sag.

Txāa pa'gatey kîhtewa jxuka ajāwa'ja's idxçxaçxáa ji'phgu,

Txāasa açxha' jxkaahna üsgu.

¹⁸Naa kiwete nasa' idxa's ahçetx, nawa txāawe'sxtxi kastigäywa'j ena' ajk.

Açá' txā'wēy uusaawe'sxtxiwa kastigaïne'ga.

Sa' walasa ma'tx yuu meeçxa' le'çxkwesa ma'tx yuu nawa idx
yakh txutemée fxi'zeçxa iidx yase's açewe'wesameewe'sxtxi'
deweene'ga ew yūuna iidx yuwe's pta'sxna selpiina fxi'zepa'ga.

Naapkaçxha' naa kiwete suwna üssawe'sxtxi's ka'tu' ivxiitune'ga
jinatx we'we.

¹⁹Txajü' cielute Dxus üsni phatek, açá' na'wē Dxusa' nasa yakh puutx we'wek txāa puutx we'weni's fxi'lçxa kajate jxaawni yuuk txāa kaja' vxyaak. Naapkaçxha' kpi'sx kwehneçxa seena' susku kwetuba seena' wala āsxna, açá' ehdwa u'kh.

U'ya's eçx seena'sa ikh wēeni

12 ¹Txajü' ēe walaju na'wēk seena'sa vxyaa: teeçx u'y txajx kakwete yu' sekçxaçxáa ji'phsa a'tete yujuçxak üsu', sa' dxikthete yu' teeçx korona doce estrelxa ji'phsa'sku ji'phu'. ²Txāa u'ya' nasatek açā'aç yu', sa' seena' wala pxthaa yakana pebe'k.

³Txāa e'su' ēe walaju ki' vxite na'wēk vxyaa: eçx behsa iiméh seena'sa siete dxikthé ji'phsa, diez kaaçxuk ji'phu', sa' dxikthé iisa teeçx koronak ji'phu'. ⁴Txajx mezu yu' estrelxatx puupxāhn āatuwku suwçxa naa kiwekhē pūsx. Sa' txāa eçx seena'sa yu' u'y nasa kasejxa' üsu'k txāa yaçtek ūyhasna yuju, nasa kasejeçpkaçxha' luuçxa's ū'ya'. ⁵Txajü' txāa u'ya' teeçx luuçx pihçku ji'phu, txāak naa kiwete jxuka jxkaahwa'jsa yu' iiméh wala juuna'. Txajü' txāa luuçxa's kusa'lçxa, Dxus jxkaahna üsnitek jxūna u'jni yuu. ⁶Açá' txāa u'ya' nasa u'pnmíeé kiwetek ūphna u'l, txāa jii Dxus pheu'lçxa ji'phune' kxtee üsya'. Kxtee pa'the', mil doscientos sesenta en āhpkaçx sā'jîni ūswa'jsa'.

⁷Txãa e'su' cielute puiiwa'kh u'pu', açã' Dxus angel npiiçthê'jsa Migwela' txajx angeleswe'sx yakh puiitx eçx seena'sa yakh. Açã' eçx seena'sawa txãa yakh üssawe'sx yakh kasejk puiiya'. ⁸Nawa eçxa' knayme', sa' txãawe'sxa' cielute üswa'lj jil'phmeetx neeyüu. ⁹Txãa pa'ga eçx seena'sa's ekaju wãataanik yuu, txãa'fik txãniitey ul jïnisã yu', naa kiwetewe'sx jxukaysatx ixsïina kaypuba'jsa Eçxthê'kh yaase yu'. Txãa eçxthê'j vxite' txãa yakh üssa jxukaysatx naa kiwekhê wãataanitx yuu.

¹⁰Txajü' cieluju sus we'wena na'jini'sthü wêse'lj:

—Ewte neeyüuwa'lj en pa'kh, kwe'sx Dxus txãaçxaçxãa jxkaahwa'lj en vxite' Dxus txhitxhnisa Kristowa txã'wëy jxkaahwa'lj en. Txãa pa'gatey kwe'sx yakthê'jwe'sxtxi ewmeesata' jïna pãatxhî'khna üssa's ekaju wãataanik yuu, txãa'fik bagaçxtewa pu'vxitumée nes yu' kwe'sxtxi pãatxhî'khna. ¹¹Txã'wëtewa, kwe'sx yakthê'jwe'sxa' eçx ewmeesa's knaytxi, na'wê Piisxakuë jïnisã ikhni uuk txajx eeju vxite' txajx kaapiya'jni's pu'vxitumée pta'sxna fxi'zepa'ga. Txãawe'sxa' Kristo's selpiipa'ga uu en pa'thewa txã'sa' nxusmée uuya'çxáatx üsu'. ¹²Txã'wê ewmeesa's knaypa'ga weçxweçxa miyajkxwe, cielute fxi'zesawe'sx jxuka. Nawa seena' yuh wala üukhüukha' naa kiwete mteewe'sxwa jxukaysa yakha'. Txã'wê üukhüukh yuukahnü eçxthê'ja' i'kwe'sxtxi pkxuuya' kïjk seena' wala üusaçxana, sa' kuh enmée üswa'ja's jiaa' txãasa txã'wê üusaçxana üsa'.

¹³Sa' txãa eçx seena'sa' kiwekhê wãataani yuuçxa', txãa u'y luuçx jil'phusa's ikhya' pakwek. ¹⁴Nawa txãa u'ya's uuh wala fxu ku'ta na'wësa's üsnik yuu, eçx seena'sa tasxu iyuna u'ljçxa nasa u'pnimée kiwete txajx üswa'the fxuhna u'khan, kxteea' tekx anxu pxãhtepkaçx sã'ljïnik fxi'zewa'jsa yu'. ¹⁵Txajü' txãa eçxa' yuwesuk yu' nuysêh, yu'a's seena' wala nuywalaaçxa txãa u'ya's yu' jxüna u'khan. ¹⁶Nawa txãa eçx yuwesü yu'sëesa's kiwe' jxuka çxazxaçxa txãa u'ya's nwe'wek. ¹⁷⁻¹⁸Txã'wê yüute', txãa eçx seena'sa' txãa u'ya's jwee'çxáak seena' wala üusaçxa. Sa' txãa u'y jil'jwe'sx yakh puiiya'k u'lj Dxus jxkaahnitxi's nwëese'jna Jesukristo kaapiya'jni's jxpubamée nwëese'jsawe'sx yakh.

E'z eçx seena' üukhüukhsa

13 ¹Txãa e'su' mar pukateth yujuçxa üsu', sa' uythu eçx seena' kazx üukhüukhsa mar pxãjü kasejeçte, sa' siete dxikthê jil'phçxa diez kaaçxuk jil'phu', kaaçxu iisa teeçx koronak jil'phu'. Sa' txãa dxikthesu yu' Kristo's seena' kazx açewe'wenak fxi'ljini yu'. ²Txãa eçx seena' kazx üukhüukhsa' txiklxi na'wêk jxkajkwe yu', çxida yu' oso na'wëtux yu', sa' yuwe yu' león na'wêk yu'. Açã' eçxthê'ja' txãa eçx seena' kazx üukhüukhsa's kïh yüuya'wa äjãwa'ja's üsçxa txajx jxkaahna üsni'swa dukhku, sa' kïhtewa jxuka pu'çxya'k neeyüu. ³Txãa eçx seena' kazx üukhüukhsa dxikthê teeçxsa yu' uupçxãjk kpã'yuuni yu', nawa txãa kpã'

yu' wēetniyā'kh yu', aça' naa kiwete nasa jxukaysa txāa eçx seena' kazx ũukhũukhsaçxá'stxi weçxana utxaaçxa neewe'we. ⁴Sa' eçxthē'ja'swa weçxana neewe'wetx, txā'wē eçx seena' kazx ũukhũukhsa's jxkaahwa'jsa vxitçxa ki'ppa'ga. Sa' eçx seena' kazx ũukhũukhsa yu'sa' na'jīnatx neewe'we':

—¿Kim naa na'wēy seena'sa ũski, sa' kim txāa yakh puiiya' çxhâçxhakx? jī'tx.

⁵⁻⁶Sa' eçx seena' kazx ũukhũukhsa's kwe'we'jnik yuu, Dxusa's wēesxuuna açewe'wekahn. Aça' kxtey yuuçxa, Dxusa's wēesxuuçxa açewe'wena Dxus ũsni'swa açewe'wek, cielute ũssawe'sxtxiwa txā'wēyku açewe'we. Sa' txāak jxkaahwa'jsa yuu kuarenta y dos a'te âhpkaçx. ⁷Sa' Dxus luuçxtxi ahçeçxa gweçxa'swa vxit kaahnik yuu knaypkaçx. Txāasak naa kiwete jxukaysawe'sxtxi jxkaahwa'jsa yuu, nasa ma'wēsawa maa çxhabuwe'sxwa fxiyfyiy we'wesawa jxukaysatx. ⁸Aça' na'wē Piisakuē jīnisa ikhni yuuk txā' libru jī'pha' bagaçxte yuhwa uuwa'jsamée yasetx fxi'jni, aça' naa kiwetewe'sx jxukaysa txāawe'sx yase's naa kiwe's vxitiynaçxáa yuhwa txāa librute fxi'jnimeesa' jxukaysa txāa eçx kazx ũukhũukhsa's neewe'wetx.

⁹Txāa ente' na'wē seena' yuutxna txā'sa' mwēese'jwe: ¹⁰Nasatx preesu'jsa' txāawe'sxwa preesu'jni yuutxna. Aça' nasatx kçxilxuh ikhsa' txāawe'sxwa kçxilxuh ikhni yuutxna. Txāa pa'ga Dxus luuçxa' Dxus yakh yuuçxáa çxhâçxha fxi'zewa'ja's jī'phuwa'j peeçxta'.

¹¹Txāa e'su' vxite eçx seena' kazxsa kiwe dxiiñũ kâjaçte uythu. Txā' piisxáa kaaçxu na'wēsa e'zku jī'phu', nawa txāa eçx seena' kazx ũukhũukhsa na'wēyku Kristo's açewe'we'. ¹²Sa' eçx kazxsa nyafxtewe'sx na'wēy jxkaajxa' âjāwa'ja'sku jī'phu', txāasak naa kiwete nasa jxukaysatx jxkaaja', eçx na'wē dxikthete kpā' seena'sa jī'phuçxawa wēetku txā'sna neewe'wekahn. ¹³Sa' kījkihwa seena'sa'swa kaavxya'ja'jya' âjā'k, cielujũ ipx wala seena'sa kaakīiji'jna naa kiwete nasa uyna ũste. ¹⁴Eçx kazxsa nyafxtewe'sx tasxte seena'sa's kaavxya'ja'jya' âjāçxa, naa kiwete nasa jxukaysatx kaypuba'kh Dxus yuwe pta'sxsa na'wē kīhwa kaavxya'ja'jçxa. Sa' seena' dxikthete kpā' jī'phçxawa uumée çxhâçxhak txāa na'wēysa piisakaakh itxīmeesa. ¹⁵Sa' eçx kazxsa kiwe dxiiñũ kāasa' txāa piisanisa itxīmeesa's itxī vxit-ya' âjāwa'ja's jī'phu'k. Aça' txāa itxī vxitnisa's neewe'wesamée yuutxi'sa' kiwe dxiiñũ kāasa eçxa' kiikhel'jwa'jsak yu'. ¹⁶Txajũ' eçx kiwe dxiiñũ kāasa' na'wēk yũu jxukaysatx: le'çxkwesa, walasa, jī'phsa, jī'phmeesa, patron jī'phsa, patron jī'phmeesa, teeçx yuhwa nvxihtmée jxukaysatx iisawa'khaakh paçu kusete meeçxawa dxi'pte. ¹⁷Sa' txāa eçx kiwe dxiiñũ kāasa yaseju iisawa'jni's meeçxawa txāa yase numero's jī'phmeesa yu', kīh yuhwa weyya' âjāmeetxna, sa' txweyya'wa âjāmeetxna maa yuhwa. ¹⁸Sa' txāa eçx kazxsa numero' kwe'sx jiyunisa'. Aça' txā'sa' jiyuwa'jsa ũsçxa', ũus miiyajkwwe: txāa numero' seiscientos sesenta y seisa'.

Ciento kuarenta y quatro mil nasa memniisa

14 ¹Txāa e'su' uythu Piisxakuē jīnisa Sion thā'j vxiçte yujuçxa ũste. Txāa yakh vxite ũsu'tx, ciento kuarenta y quatro mil nasa, txāawe'sx dxikthesu yu' Piisxakuē jīnisa yase vxite' txajx Tata yase's ji'phsa. ²Txajū' cielujū susni pthūusek yu'wala kuhsa susni na'wē vxite' kpi'sx çxhāçxha we'weni na'wē susni, iiméh wala kuhsa txāawe'sx arpa tukani na'wēk pthūuse'. ³Txāa nasa' mem u'sesatx memu', Dxus jxkaahna ũsni vxite' Dxus vxitni itxīsa pahzsawe'sx vxite' Dxus luuçxtxi jxkaahsawe'sx txāawe'sx tasxte. Txā'sa' kim yuhwa piyaya' āja'çmeeta', naasāa naa kiwetewe'sx ksxavxyu ewte neeyūsāa ciento kuarenta y quatro mil txāawe'sx yuuçxáatx ājä'. ⁴Txāawe'sxa' Dxus yuuçxāana selpiina fxi'zesatx yu', sa' txāawe'sxa' nasaa ksxavxyu nwe'wenitx yuu Dxus jīi vxite' Piisxakuē jīnisa txāa jīi yuua'jsa, nyafxte nwe'wenisa. Txāasatx Piisxakuē jīnisa ikhni yuuk txāa mtee u'thewa txāa yakh ja'da u'jwe'. ⁵Sa' kīhçxāa yuhwa īsxīisa yu'çmeeta', sa' Dxus jxkaahna ũsni kīh pkal yuhwa ji'phmēe ũsta'.

Dxus angeleswe'sx tekhsa pta'sxya' kasehni

⁶Txajū' Dxus angel fxuhna u'jweçteth uy ēe wasasu. Sa' ewte neeyūunisa bagaçxte yuhwa pçuwa'jsame's pta'sxwa'ja'sku ji'phu' naa kiwetewe'sx mtee mteewe'sxtxiwa, nasa ma'wēsa, fxiyfxiçxāa we'wesa, maa çxhabsuwe'sxtxiwa jxuka. ⁷Sa' na'jīnak sus we'we':

—Dxusa's mtuuthe'jwe ũukhna. Txā'wēme' jxukaysatx kastigāywa'j ena' ājxā'kh. Mneewe'wewe cielu, kiwe, mar, yu', kijkīhnawa jxuka vxit-sa's jī'k.

⁸Txajū' Dxus angel vxite na'jīnak sus we'we':

—Babilonia çxhab txakwe çxhāçxhasaçxawa, Dxus kastigo's jxpa'gawa'the yā'j ũsa'. Txā'wē yuukahnīi naa kiwete nasa mteewe'sxtxiwa jxukaysa pkal kazxte fxi'zewa'ja'sku kaapiya'j naa pa'ga jī'k.

⁹Txajū' Dxus angel tekhtewe'sxku na'jīna sus we'we':

—Maawa eçx seena'sa vxite' txāa na'wēy piisani yuuk txāatx neewe'weçxa, txajx iisawa'jni's kaaki'pu'ljuna dxi'pte meeçxawa kusete na', ¹⁰txā'wē yūusa' Dxus kastigo seena' nxussa's jxpa'gatxna txā'wē yūupa'ga. Sa' seena' yuh kastigāyni yuuna asufxre ipx walate, Dxus angeleswe'sx vxite' Piisxakuē jīnisa ikhni yuuk txāawe'sx dxi'pte.

¹¹Kastigāyni ipx wala aja' bagaçxte yuhwa pçumée sxi'tana nes yuuna. Aça' kxteea' en ma'k yuu kus ma'k yuu nawa bagaçxte yuhwa jxkaasewa'ja's ji'phumeetxna, txā'wē eçx seena'sa vxite' txāa na'wēy piisani yuuk txāatx neewe'weçxa txajx yaseju iisawa'jni's kaaki'pu'pha'ga. ¹²Txāa pa'ga Dxus luuçxa' txajx jxkaahni's kxtey nwēese'jna Jesus yakh yuuçxāa çxhāçxha fxi'zewa'ja's ji'phuwa'j peejxta' jī'k.

¹³Txajū' ki' wēse'th we'weni cielujūwe'sx, txā' adxa's na'jī'k:

—Naa skhēwnijū Kristo's jxpa'gaçxa uusaawe'sxa' wala yuh wētwe't fxi'zesa yuutxna jīni's mfxi'j jīte', Dxus Espiritu pasçxa': Txā'wē yuja', txāawe'sxa' jxkaasetxna Dxusna selpiina pxthaa yuuna fxi'zenijū, sa' cielute yuutxna txāawe'sx mjīni's jī'k.

Skuutxh uwatx pkhakhni

¹⁴Txajū' thegçxa uythu tāaph çxihme kajkwete nasa yuusáa na'wēsak teeçx kaççxa u'pu'. Dixikthete vxyuu bee koronak ji'phu', sa' kusete yu' skuutxh wakani zeksa'sku ji'phu'. ¹⁵Cielute Dxus ūsnijū vxite angel sus we'wena kasejk tāaphthe kaççxa u'psa's na'jīna:

—Skuutxha's wakaçxa mepkhakh. Txā'wēme' jxuka thē'kh aça' pkhakhwa'j en ājk jīte', ¹⁶tāaphthe kaççxa u'psa' naa kiwete skuutxha's wakaçxa jxuka pkhakhku.

¹⁷Txajū' cielute Dxus ūsnijū vxite angelwa kasejk uwa udeni zeksa's atçxa. ¹⁸Naapkaçxha' Dxus altaluh vxite angel kasejk txā' ipxa's kaahwa'jsak yu'. Sa' uwa udenisa's ji'phsa's na'jīnak sus we'we:

—Uwa's uhdeçxa mepkhakh. Txā'wēme' jxuka thē'jni yā'j ūsta' naa kiwete jīte', ¹⁹Dxus angela' naa kiwete uwa's jxuka uhdeçxa pkhakhku, sa' teeçx ahteçxaçxáak jxuka āsx kxtee ku'sya'. Txāa yu' Dxus kastigo' na'wē seena' yu'wa'jsa' jīnisak yu'. ²⁰Txāa uwatxi's çxhab ekajk ku'sni yuu, aça' eeçxaçxáak uwu jiba fxrenusu kāhpkaçx, tres cientos kilómetro peeku'jsu pkaçxku txā'wē uta.

Dxus angeleswe'sx siete kastigotx ji'phsa

15 ¹Vxite seena' ūukhūukhsa cielute uythu: siete angeleswe'sxa' siete kastigo's pta'sxsatx yu'. Txāa siete kastigosa' nmehsatx yu' Dxus kastigo.

²Mar ipx ka'dni na'wēsa zhiçxkwe speeju na'wē khikhyna ūste uythu. Aça' eçx seena'sa vxite' txāa eçx na'wēy piisani yuuk vxite' txajx yase numero txā'wēsatsx nwēese'jsameewe'sx yu' txāa mar pukate yujuçxatsx ūsu', tukani arpatx Dxus ūsku txāatx atçxa. ³Sa' Dxusna selpisáa Moises mema's memu'tx, vxite' Piisxakuē jīnisa'swa weçxana memu'tx na'jīna:

Dxus, kīhtewa jxuka ājāsa,

Seena' yuh wala pu'çxgu kīhtewa jxuka.

Naa kiwete jxuka jxkaahsa iidx mjīni' jxuka ewçxaçxáata'.

⁴Kwe'sxtxi jxkaahsag aça' çidxa's kim ūukhmée yuukx?

Sa' çkim idxa's tuuthe'jmée yuukx?

Idx yuuçxáa pkal ji'phmée atesag, aça' maa kiwejuwe'sxwa jxuka idxçxaçxá's neewe'wetxna,

Txāa pa'gatey idx ew yūunisa' āatek yuu jīnatx memu'.

⁵Txā'wē yūunijū' ki' vxite uythu, cielute Dxus ūsnite Dxus leytxi jxaawni vxitx phateeçte. ⁶Aça' txāa Dxus ūsnijū yu' siete angeleswe'sxtxi

kaseh, siete kastigo seena'satx jxũçxa. Txãawe'sxa' athni ropa ate kwentetesatx ji'phu'. Sa' jxtudnisa yu' vxyuu behçxaçxáa peçxun kãhsatx ji'phu'. ⁷Txajũ' Dxus vxitni itxĩsa pahzsatewe'sx teeçxsa' vxyuu bee kopa ũsku teeçxsa na'wẽçxah txãa siete angeleswe'sxtxi. Kxtee yu' kastigo seena'saçxaçxáa utatx ji'ph yu' Dxus bagaçxtewa nes yuuwa'jsa kaahni. ⁸Aça' txãa Dxus ũsnite yu' jxuka ahçxaçxáa utak, Dxus kĩhtewa jxuka ajãwa'jsa tasxu yuusak yu'. Aça' kxtee yu' kim yuhwa u'kaya' ajã'çmeeta', siete kastigo siete angeleswe'sx ji'phu'tx txãa pçumeyna yu'.

Siete kopa Dxus kastigo's ji'phsa

16 ¹Txajũ' siete angeleswe'sxtxi na'jĩna sus we'weni wẽse'th Dxus ũsnijũ:

—Dxus kaahni kastigo seena'satx siete kopate ji'phi'kwe txãatx me'ljwe pkawya' kiwete jĩte', ²Dxus angel nyafxtewe'sxa' u'lçxa txãa kopatewe'sxa's kiwete pkawku. Aça' txã'wẽ yũute', nasa jxukaysa eçx seena' kazxsa vxite' txãa eçx na'wẽy piisani yuuk txãatx neewe'wesawe'sxtxi's kakwete wãljy seena' akasa pa'kh.

³Dxus angel e'stewe'sxa' txãa kopatewe'sxa's martek aw, aça' txãa mara' nasaa ee na'wẽçxaçxáak yuu jxuka. Txã'wẽ yũute', txãa marte ũssa itxĩsa jxuka uutx.

⁴Txajũ' Dxus angel tekhtewe'sxa' txãa kopatewe'sxa's yu'walasu vxite' yu'le'çxkuẽsu kxsũuk aw, aça' yu' ma'wẽsawa jxuka eeçxaçxáatx yuu.

⁵Txajũ' Dxus angel yu'a's thegsa' na'jĩna we'weni'sth wẽse'lj: Dxus, nyafxĩwa idxgu yu' sa' açxwa txãaíçxáag, Dxus atesa. Txãasag txã'wẽ kastigaĩ'. ⁶Iidx yuwe's pta'sxpa'ga ahççexa idx yakh fxi'zesawe'sxtxi ee pkawtxi, txãa pa'gag txã'wẽ yũusatxi's ka'tuwa ee yusu'. Txãawe'sxa' kastigo's jxpa'gawa'lj ji'ph yuhta' jĩ'k.

⁷Naapkaçxha' Dxus altaluh na'jĩna vxite we'weni'swa wẽse'th:

—Dxus kĩhtewa jxuka ajãsa idxa' peekxçxáa kastigaĩmée, isag kastigaĩ' jĩnik pthũuse.

⁸Txajũ' Dxus angel pahztewe'sxa' txãa kopatewe'sxa's sektek aw. Txã'wẽ yũute', seka' nasatx iiméh wala açxa kweethkahnku txã'wẽ yuu.

⁹Aça' jxukaysa iiméh seena' wala çxhavxytxi. Nawa pkala's nvxihtçxa Dxus tasxte yu' sxawedmeeta' txã'sna neewe'weya'. Txã'wẽ Dxusna yaakipkaçxte, jweeíçxáatx txã'sna açewe'we' txã'wẽ seena' kastigãyya' ajãsa's.

¹⁰Txajũ' Dxus angel tahçtewe'sxa' txãa kopatewe'sxa's eçx seena' kazx ũukhũukhsa jxkaahna ũsnitek aw, aça' txãa jxkaahna ũsni kiwe' çxhi'dxteçxáak yuu. Txã'wẽ seena' yuute', nasa' ũusçxaniite thune's ya'wa'ki'tx kastigo txakwe seena'sa pa'pha'ga. ¹¹Makwe txã'wẽ yuutewa, txãawe'sx ewmée yũuna fxi'zeni yu'sa' weh yuhwa ivxiitu'çmeeta'. Txã'wẽ wãljy seena' akasa pa'thewa, jweeíçxáatx cielute Dxusa's açewe'we'.

¹²Txajü' Dxus angel seistewe'sxa' txãa kopatewe'sxa's Eufxrates yu'walatek aw. Aça' txã'wë yūute', txãa yu'wala' uhdxku jxkaahsawe'sx sek kãani ju'gu yuusa uykhëwya' ãjãkahn.

¹³Txajü' na'wësath vxite uy: Eçxthë'j yuwejü vxite' eçx seena' kazxsa Kristo's açewe'wesa yuwejü vxite' eçx kazxsa Dxus yuwe pta'sxsa na'wë kîhwa kaavxya'ja'jçxa kaypuba'jsa yuwejü tekh eçxtxi kaseh sap na'wësa. ¹⁴⁻¹⁶Txãa eçx sap na'wësa yu' kîjkihwa seena'satx kaavxya'ja'jya' ãjã'tx, sa' txãawe'sxa' naa kiwete jxkaahsa jxukaysatx pkhakhya' u'jtx, nmeh ente Dxus txakwe çxhãçxhasa yakh puiiya' sũhçxa. Sa' jxkaahsawe'sx jxukaysatx pkhakhtxi hebreo yuwete Armagedón ji'tx teeçx ahte kxtee. Kristo we'weçxa': Yajxnmée üsiyna, peswée na'wëçxãa pa'ja'nja, açã' txãa ente thaamena üsya'mée, Dxus yakh txutemée fxi'zesa' wala yuh wët wët neeyüutxna jî'k.

¹⁷Txajü' Dxus angel sietetewe'sxa' txãa kopatewe'sxa's êesuk pkaw, naapkaçxha' Dxus üsni cielujü na'jînisak sus we'weni pthüuse txajx jxkaahna üsnijü:

—Na' Dxus kastigo nmehtewe'sxa' jî'k.

¹⁸Txajü' kpi'sx kwehnena we'weni seena' susku, açã' ehd iiméh seena' çxhãçxha u'kh, naa kiwe yuuiyna bagaçxte yuhwa txã'wë yu' ehd çxhãçxha u'jweçmeene'. ¹⁹Txã'wë ehd u'pha'ga naa kiwete çxhab jxuka pçuutx. Açã' çxhab iiméh seena' walasawa tekh ahsutx upe. Açã' Dxusa' yajxkku Babilonia çxhab wala's jxukate kastigãyya', seena' ewmée yūupa'ga. ²⁰Txajü' mar pxãhsu kiwe u'psa vxite' vxiç wala jxuka vxitutx. ²¹Naapkaçxha' cielujü kwetuba nasaa kajkwekhë üsxitx seena' walasa pahz açxoba ãh duhsa. Açã' txã'wë seena' yūute', nasa yu' jweeüçxáatx Dxusa's açewe'we', txã'wë kastigo seena'sa's kaapha'ga.

U'y kazx pkal yūusa's ivxiituni

17 ¹Txajü' siete angeleswe'sx na'wë siete kopa ji'phu'tx txãatewe'sx teeçxsa's uythu, açã' adxa's na'wëk we'we:

—Ayte myuh, na'wë u'y kazx yūuna fxi'zesa mar kajkwete kaççxa u'pa' txã'sna kastigãywa'ja's pta'sxya'wath. ²Maa kiwete jxkaahsawe'sxwa txãa u'y yakhçxaçxáatx kazx pkal yūuna fxi'ze', açã' naa kiwete nasa' txãa kazx fxi'zewa'j yuuçxáanatx piyana üsu'.

³Txajü' adxa' Dxus Espiritu aphniith yuu, açã' Dxus angela' adxa's pe'jna u'kh nasa u'pnimée kiwete. Kxteea' teeçx u'y eçx beh seena' kazxsa kajkwete a'jçxa u'pteth uy. Açã' txãa eçx seena' kazxsa kakwete yu' Dxusna açewe'wena fxi'jnisaçxãa utak ji'phu', sa' siete dxikthé diez kaaçxuk ji'phu'. ⁴Txãa u'ya' athni ropa iiméh ew behsak ji'phu', vxyuu beh vxite' kwet zhiçxkwesa vxite' perla iiméh pa'gasa txã'wësa atxhku iijxü yu'. Sa' kusete yu' vxyuu bee kopa ewmée kazxsaçxaçxãa uta ji'phsa'sku ji'phu'.

⁵Sa' dxikthete yu' na'wëk fxi'jni yu': Babilonia çxhab kazx jxtuhtesa kazx

yūuwa'ja's kaapiya'jsa jīnak fxi'jni yu'. ⁶Txajū' jiyuth, txāa u'ya' tūunik yu' Dxus luuçxwe'sx ee vxite' Jesus kaapiya'jni's pta'sxpa'ga ikhni yuutx txāawe'sx ee yakh. Sa' u'y txā'wēsa's uyçxa', wala ūukththu.

⁷Txajū' Dxus angela' na'jī'k:

—¿Kīh yūuçxa ūukhna ūsga? Kaajiyu'jya'wath txāa u'y ma'wēsatewa vxite' txāa eçx seena' kazxsa tū'sna u'l'jweça' siete dxikthé j'i'phçxa diez kaaçxu j'i'pha' txā'sna. ⁸Eçx seena' kazxsa's uygu txā' nyafxíi yu' ūsu'k, nawa âçxha' meea'. Txā'wēçxawa kafx iiméh seena' dxiisajū kasejena vxituya'. Aça' naa kiwetewe'sx jxukaysa txāawe'sx yase's bagaçxteçxáa yuhwa uuwa'jmée itxī fxi'zewa'j librute fxi'jnimeesa yu' wala yuh ūukhuxtina txāa eçx seena' kazxsa ki' vxyaana txā'sna uyçxa.

⁹Na'sa' jiyuwa'jsa ūsçxa', mjiyuwe: U'y kaçççxa u'pa' txāa eçx dxikthé sietesa' siete vxix walata'. ¹⁰Sa' txāa dxikthefiçxáa siete jxkaahsata'. Txāa jxkaahsawe'sxa' tahçsa yu' vxituyā'jtx, aça' âçxha' seistewe'sxa' jxkaahna ūsa', nawa nmehtewe'sx sietesa yu' jxkaajxa' takhmeya'. Nawa txāa nmehtewe'sxa' jwee yu' txaçxmée jxkaajana. ¹¹Eçx seena' kazxsa nyafxíi yu' ūsu'k nawa âçxha' meea' txā' jxkaahsa sietesak yu'. Nawa ew jiyute yu', txāafiçxáa jxkaahsa oçxotewe'sx yu'wa'jsa'. Txāa e'su isa jxukate vxituna.

¹²Sa' diez kaaçxu uygu txāa yu' diez jxkaahsawe'sxta'. Nawa txāawe'sxa' jxkaajxa' takhmeya'. Nawa jxkaahsa yu'wa'ja's jxpa'gatzna wala txaçxmeeuēçxáa, eçx seena' kazxsa yakh ja'daçxah. ¹³Txāa diez jxkaahsawe'sxa' ma'wē yūuwa'ja'swa kxazíi ja'daçxah puutx we'weçxa ūsta'. Txāasa eçx seena' kazxsa's kçxhāaçxha'jatxna kxteeçxah jxkaah pu'çxna. ¹⁴Txā'wē yūuçxa Piisakuē jīnisa yakh puuixna. Nawa Piisakuē jīnisa yuh pejka knayuuna txāawe'sxtxi', txāa pa'gatey txā' Maatewa Jxthaakwe Çxhāçxhasa', sa' Maa Jxkaahsatewa Jxthaakwe Jxtuhthesa'. Aça' txāa yakh ūssa' Dxus peeygāhçxa nwe'wenisata' txāa yakh txutemée fxi'zesa.

¹⁵Txajū' Dxus angela' vxite na'wēsa'swa pta'sxku:

—Na'wē u'y kazx pkal yūuna fxi'zesa kaçççxa u'pni mar uygu txā' naata': maa kiwete çxhabwa jxuka, nasa majūwe'sxwa fxiyfyiçxah we'wesa txāata'. ¹⁶Sa' eçx seena' kazxsa dxikthesu diez kaaçxu uygu txā' jxkaahsa yu'wa'jsata', sa' u'y kazx pkal yūuna fxi'zesa's ahçççxa sūpççxáa wāatajatxna. Txā'wē yūuçxa, kakwete çxiçx yu'sa' ū'çxa ipxte kabutxna. ¹⁷Txāa u'ya's txā'wē yūuçxa ivxiitukahn, Dxus ne' jxthāas. Txāa pa'ga txāa jxkaahsawe'sxa' eçx seena' kazxsa's kçxhāaçxhal'j pu'çççxa txā'wē yūutxna, Dxus we'weni' kxtey yuukahn. ¹⁸Aça' u'y kaçççxa u'pte uygu txāa yu' Babilonia çxhab kazx jxtuhthesa', naa kiwete jxkaahsa jxukaysatx txāaçxçxáa jxkaahna ūssa.

Babilonia vxituni

18 ¹Txāa e'su' Dxus angel cielu'jū kījaçteth uy seena' juuna' jxkaahwa'jsa, naa kiwete zhiçxkwe eena' kweethna. ²Sa' na'jīnak sus we'we:

—Babilonia çxhab txakwe çxhãçxhasaçxawa, Dxus kastigo's jxpa'gawa'the yã'j ũsa'. Sa' ãçxha' eçxthê'j jxkaahni espirtu ewmeesa vxite! vxiçxakwe kazxsaçxaçxáa ũswa'j yuuna pa'kh. ³Txã'wê yũukahníi maa çxhabwa jxukaysa txãa pkal kazxsateçxaçxáatx fxi'zena ũsu!. Aça' naa kiwete jxkaahsa jxukaysawe'sx pkal kazx yũuwa'ja's yuuçxáatx piya. Txã'wêy txweysawe'sxwa wala ji'phsa yuutx, pkalte fxi'zewa'jçxá's txweyna jĩ'k.

⁴Txajũ' cielujũ na'jĩna we'weni wêse'th:

—Adx nasa yã'ja' txãa çxhabu mkaasehwe, txãa pkalsawe'sx yakh ũsya'mée, kxah txãa çxhabte kastigo' i'kwe'sxtxi's kpajkxmeena.

⁵Na'jĩ'th na': txãawe'sx pkala' iiméh seena' walani' cielute kãhpkaçx, kxajk Dxusa' txãa çxhaba's kastigãyya' yajkx txã'wê kazsapa'ga.

⁶Txãawa vxitetx ma'wêga ewmée yũu txã'wêy ewmée myũuwe ka'tuwa.

Sa' txãawa ma'wêga vxitetx juuna' yũu, txãate e'z us thaakwe juuna' myũuwe. ⁷Pkxuuna makxũusu'jwe, txãawa makwega iwejçx yajkxna pkalte fxi'zena ũsu' txãatey ãh. Sa' txã' na'wêk yaaki' txajx ũuste: Ayte jxkaahsa na'wê kaççxa u'pthu. Nmi' ji'phmeesameeth, sa' pxthaa yuuna fxi'zeme'nja sũhnak iwejçx yaaki'. ⁸Txãa pa'ga teeçx enteçxáa kastigo pa'jatxna na'wêsa: nxuswa'j, wêjê, uu en, sa' ipxte kabni yuuna. Txãa çxhaba's Dxus çxhãçxhasa' jxuka ivxiituna.

⁹Aça' naa kiwete jxkaahsawe'sx txãa çxhabte kazx pkal yũuna fxi'zesa' wala nxus we'wena ũ'netxna, txãa çxhavxyni aja's uyçxa. ¹⁰Sa' txã'wê kastigãyni's ũukhçxa, jxu'juçxáa thegutxna na'jĩna:

—Seena' yuh pxthaa yuuk, Babilonia çxhab txakwe seena' çxhãçxhasa. Naa dudte jxuka vxitunik yuu jĩtxna.

¹¹Naa kiwete txweyna fxi'zesawe'sxwa txãa çxhaba's yajkçxa wala pxthaa we'wena ũ'netxna. Txã'wê yũukahníi ãçxyã'ja' peena yu' kim yuhwa weymeetxna makwe tũ'sna pa'thewa: ¹²vxyuu beh, vxyuu çxihme, kwet zhiçxkwe wala pa'gasa, tela zhiçxkwesa iiméh pa'gasa, fxtũu wêt putasá, marfxil zhiçxkwesa, fxtũu ewsa wala pa'gasa, bronce yaasesa, hieçxo yaasesa, marmól yaasesa, kĩjkĩhwa txã'wê zhiçxkwe vxitnisa. ¹³Vxite' ũ'nisate wêt pëethësa, kabte wêt putasá, wêt putakahn kakwete sxũsnisa, vxino, aceite, skuutxh ũ'we ewsa. Vxite' tajkx ktũ'se'jnisa, piisxáa, jiba, kaçxetilxa jiba wezxnisa. Vxite' nasa txweynisa kĩh yuhnawa ya'txweymeena. ¹⁴Sa' txãa çxhaba's na'jĩtxna:

—jTxakwe wala weçxana fxi'zeni's ji'phméek neeyũu, sa' txakwe zhiçxkwe ji'phuni'swa jxukate ivxiituk! jĩtxna.

¹⁵Txãa çxhabte kĩjkĩhwa txweyçxa wala ji'phsa yuusaawe'sxa' jxu'juçxáa thegna neeyũutxna kastigãyni's ũukhçxa. Sa' wala nxus we'wena ũ'netxna ¹⁶na'jĩna:

—jTxãa çxhab txakwe walasa seena' yuh yuuk! Nyafxíi yu' u'y na'wêk zhiçxkwe iijxũçxa fxi'ze!, ropa iiméh pa'gasa, vxyuu beh ki'pna yuunisa,

kwet zhiçxkwesa iiméh pa'gasaçxaçáatx txã'wēsatsku iijxū'. ¹⁷Nawa txãa ji'phunisa naa dudte jxuka pçuuk jïtxna. Txã'wēy barko namuwe'sx, vxite' kxtee mjïisawe'sx jxukaysa jxu'juçxáa thegna neeyūutxna. ¹⁸Sa' txãa çxhab çxhavxyna sxl'tasa aja's uyçxa', na'jina sus we'wetxna:

—Mtee yuhwa naa çxhab na'wēy walasa yu' meea' jina, ¹⁹nxusweete dxikthehkē kiwe ya'fxihbna sus ũ'nena na'jïtxna:

—Seena' nxusnxus knayku çxhab txakwe walasa txajx ji'phuni yakh wala ji'phsa vxitku barko ji'phsa yuutxi' jxukaysatx. Nawa naa dudte jxuka vxitunik yuu jïtxna.

²⁰Nawa cielute ũssawe'sx wala yuh mweeçxawe txãa çxhaba's kastigäyñi's uyçxa, Jesus jxkaahnisawe'sx vxite' Dxus yuwe pta'sxsawe'sx, Dxus yakh fxi'zesawe'sx jxukaysa. Txãa pa'gatey Dxusa' txãa çxhaba's kastigäyyä'kh, i'kwe'sxtxi ewmée yūupa'ga jïnik pthūuse.

²¹Txajū' Dxus angel teeçxa' seena' wala çxhãçxhasa ũ'khni kwet na'wēsa's kiisçxa, markhēk wāatah na'jina:

—Babilonia çxhab txakwe walasa txã'wē wāataani yuuna, aç'a' txã'sa' bagaçxte yuhwa peena yu' uymeetxna. ²²Aç'a' txãa çxhab klxiikhunsu tukani músika arpa, kuvxy, trompeta txã'wēsa pthūusemeetxna. Sa' txãa çxhabte kīh mjïisa yuhwamée yuutxna, sa' ũ'khniçxáa yuhwa pthūusemeena. ²³Kxtee pki'taniçxáa yuhwa kweethmeena, sa' boda fxiesta vxitna susniwa peena yu' pthūusemeena. Txãa çxhaba' txweyna ũssawe'sx wala yuh çxhãçxhasatx ji'phu'k, sa' naa kiwetewe'sxtxi jxuka kaypuba'kh dxijxuuçxa. Nawa açxha' kīh yuhwa ji'phmée yuuna jī'k. ²⁴Txã'wē yuukahní Dxus yuwe pta'sxsawe'sx vxite' Dxus yakh fxi'zesawe'sx vxite' naa kiwete mtee mteewa ikhnisawe'sx eea' jxuka txãa çxhabteçxaçxáak ũs yu'.

Dxusa's cielute weçxana ũsni

19 ¹Txãa e'su' cielujū nasa wala kuhsa sus we'weni wēse'th na'jina: Kwe'sx Dxus çxhãçxhasa txãa yuuçxáa ewte nvxiit-sa',

Sa' txãa yuuçxáa jxtulthesa',

Txãa pa'ga kwe'sx Dxusa's weçxaaga.

²Txãasaíik çxhab txã'wē kazx yūuwa'ja'sçxáa kaapiya'jsa's kastigäy, Naa kiwete kazx yūuna suwna ũssa's.

Sa' Dxusna selpisaatx ikhpa'ga ka'tuwa Dxusa' kastigäyku jī'tx.

³Txajū' ki'kin we'wetx na'jina:

—Kwe'sx Dxusa's weçxaaga. Txãa çxhab çxhavxyni aja' bagaçxte yuhwa pçumée sxl'tana nes yuuna jī'çpkaçxha', ⁴weintikwatro jxkaahsawe'sx vxite' Dxus vxitni itxísa pahzsawe'sxa' Dxus jxkaahna u'psa tasxte peejxūkweçxa weçxatx na'jina:

—Txã'wē yuh ew yuuk. Txãa pa'ga Dxusa's weçxaaga jī'tx.

⁵Txãa e'su' Dxus jxkaahna u'pnijū teeçx na'jina we'wenik pthūuse:

Kwe'sx Dxusa's mtuuthe'jwe, txã'sna selpisaawe'sx
 Le'çxkwesa ma'k yuu meeçxawa walasa ma'k yuu nawa txã'sçxáana
 nwēese'jna jxukaysa jī'k.

Cielute boda fxiesta āani

⁶Txajū' nasa wala kuhsa we'weni na'wēsa'sthu wēse'j txāa yu' kuh yu'
 susni na'wēk pthūuse', vxite' kpi'sx sus we'weni na'wē. Sa' na'jī'tx:

Dxusa's wala yuh weçxaaga, txāa pa'gatey kwe'sx Dxus kihtewa
 jxuka ājāsa txā' jxkaajxa' takhyā'kh.

⁷Aça' seena' wala weçxana txā'sa' tuuthe'jega, txāa pa'gatey
 Piisxakuē jīnisa nyuu yuwa'jsa' ya'pheu'kh,
 Aça' boda fxiesta ena' ājxā'kh.

⁸Txāa nyuu yuwa'jsa' ropa iiméh zhiçxkwe çihmesa's kaathe'jnik
 yuu jī'tx.

(Txāa ropa ewsa yu', Dxus dxi'pte jxpubamée ew fxi'zeni jīnisa'.)

⁹Txajū' Dxus angela' na'jīnak fxi'khaah:

—Piisxakuē jīnisa boda fxiestate pi'kxnisawe'sx yakha' wala yuh weçxa
 yuja' jīna kfxi'ja'jçxa', na'jīnak we'we:

—Na'wē we'wenisa' Dxus kwe'we'jnisasata' jīte', ¹⁰adxa' Dxus angel
 tasxte neewe'weya' peejxūkweth. Nawa txāa yu' na'jī'k:

—Adxa's peejxūkwenu. Adxa' Dxusna selpisáa idx na'wēysafíçxáath,
 iidx yakthē'jwe'sxwa ma'wēta Jesus kaapiya'jni isasa's jxpubamée
 pta'sxna pekūjū' txā'wēysath. Aça' Dxusçxáana mneewe'we. Na'wē kīhwa
 yūuna jīna kaavxya'ja'th txāa yu' Jesus ma'wēsatewa kaajiyu'jsata' jī'k.

Jiba çihmete a'jçxa kasehsa

¹¹Txāa e'su' cielu phateçxa ūsteth uy, aça' teeçx jiba çihmesak vxayaa.

Kxte a'jsa yu': Isasaçxá's Kxtey Yuusáa jīnak kxsusni yu', txāa pa'gatey
 isasa yu'sa' jxuka kxtey yuuna puiiçxa knayku naa pa'ga. ¹²Sa' txajx
 yafx yu' ipx beesa na'wēk eena' kweethe'. Dxikthete yu' wala kuh korona
 jī'phu'k, sa' vxite yase fxi'jni jī'phu'k txāa yase's txāa yuuçxáak jiisa yu'.

¹³Txajx athni ropa yu' eete akhnisa'sku jxaath yu'. Sa' txāa yu' Dxus
 ma'wēsatewa txā'sna kaajiyu'jsa' jīnisak yu'. ¹⁴Aça' txāa yakh u'jsa yu'
 cielutewe'sx jxukaysa jiba çihmesatetx a'jçxa u'jweç yu', ropa ewsa
 çihme atesa's athçxa. ¹⁵Sa' txajx yuwesu yu' espada seena' zeksak sēhna
 ūsu', txāa yakh maa kiwetewe'sxtxiwa knaywa'jsa. Txā'wē yūuçxak maa
 kiwetewa jxuka juuna' yuuna txāaçaçxáa juuna' jxkaahwa'jsa yu'. Sa'
 ewmeesa yuutxi's seena' kastigaīna kxūusu'jna, uwatx ku'ssawa ma'wēga
 seena' yū' txā'wēy yūuna Dxus kihtewa jxuka ājāsa txā'wē seena'
 kastigaīna. ¹⁶Sa' txajx athni ropate vxite' jī'besu na'jīna fxi'jnik jī'phu':
 Maa Jxkaahsatewa Jxthaakwe Jxtuhtesa', sa' Maatewa Jxthaakwe
 Çxhāçxhasa' jīna.

¹⁷Txãa e'su' Dxus angel sekte yujuçxa ùsteth uy, txã' na'ljĩnak sus we'we uuniisa çxiçxtxi's ù'sa vxiçxakuët̃x:

—Jxukaysa pkhaakheçxa myuhwe ù'ya' i'kwe'sx ù'wa'lj Dxus ùsku txã's. ¹⁸Sa' ù'wene'kwe uusaawe'sx çxiçx, jxkaahsawe'sx ma'k yuu, npiçthê'jwe'sx ma'k yuu, nasa iiméh jxtuhtesa ma'k yuu, jiba uuniisa ma'k yuu, jibate a'jsa uusaawe'sx ma'tx yuu, patron ji'phsa ma'k yuu meeçxa' patron ji'phmeesa ma'k yuu, le'çxkwesa ma'k yuu walasa ma'k yuu nawa txãatx jxuka pkhakhçxa mē'we jĩnak we'we.

¹⁹Txajũ' uythu eçx seena' kazxsa vxite' naa kiwete jxkaahsawe'sx txajx nasa yã'ljçxa jxukaysa pkhaakheçxa txãa jibate a'jsa yakh vxite' txajx nasa yã'ljçxa pdxi'puçxa puiiya' ùste. ²⁰Nawa eçx seena' kazxsa Kristo's açewe'wesa vxite' eçx kazxsa Dxus yuwe pta'sxsa na'wē kĩhwa kaavxya'ja'ljçxa kaypuba'jsa txãa yakh e'zĩ tudnitx yuu, txã'wē Kristo's açewe'wesa iisawa'jni's kaaki'pu'jna eçx seena'sa piisani yuuk txã'snawa neewe'wekahn kaypuba'pha'ga. Txajũ' txãa e'zĩtx ipx wala asufxre yakh behna ùsa' txkhēe wãatãanitx yuu itxĩtey. ²¹Txajũ' jibate a'jsa yuwesu espada seena' zeksa sēhna ùsu'k txãa espadaju ikhnitx yuu nasa ewmeesa yuutxi's, aça' uuniisa çxiçxtxi's vxiçxakwe' txikpkaçxtxi ù'.

Naa kiwete mil anxupkaçx Kristo jxkaahwa'lj

20 ¹Txãa e'su' Dxus angel cielujũ kijãçte uythu, kafx iiméh seena' dxiisatewe'sx lxavxi's atçxa, vxite' çam kadena walasa'sku ji'ph yu'. ²Sa' txãa angela' eçxthê'ja's tudku mil anxu àhpkaçx. Txã' txãniitey ul weeswēe Satanasku yaase yu'. ³Txã'wē yũuçxa kafx seena' dxiisate kxuuphçxa vxitxte yu' selxok ki'p, maa kiwetewe'sxtxiwa peena yu' ixsĩiya' kasejkhmén mil ànu àhpkaçx. Txãa mil anxu àhte', txhweteni yuuna txaçxmeeçxáawa.

⁴Txajũ' jxkaahna ùsnisatxthu uy, aça' kxsũ yu' kastigãyya' àjãwa'jsatx kaççxa u'pu'. Vxite' Jesus kaapiya'jni's nwēese'ljçxa Dxus yuwe's pta'sxna fxi'zepa'ga dxikthe's spē'thçxa ikhni yuutx txãawe'sxtxiwa uythu. Txãawe'sxa' eçx seena' kazxsa vxite' txãa eçx na'wēysa piisani yuuk txã'sna neewe'wesameetx yu', sa' txãa eçx iisawa'jni's dxikthesu meeçxawa kusesuçxáa yuhwa kaaki'pu'jsameetx yu'. Txãawe'sxa' ki' itxĩ yuuçxa mil anxutx jxkaahna ùsu' Kristo yakh ja'daçxah. ⁵Txãawe'sxa' uuçxawa ki' itxĩ yuusaata' nyafxte, nawa vxite uusaawe'sx yu' itxĩ yuumeeta' txãa mil anxu skhēwpkaçx. ⁶Dxus yakh yuuçxáa fxi'zeçxa uunijjũwa txãawe'sx khuē'y nyafxte itxĩ yuusáa yakha' seena' yuh weçxa yuja'. Txãawe'sxa' bagaçxte yuhwa Dxus yakh puutx uywa'ljmeete yu' uljmeetxna. Txãa pa'ga txãawe'sxa' mil anxupkaçx jxkaahna ùsutxna, Dxus vxite' Kristo txãawe'sx tasxte selpiina.

⁷Mil anxu skhēwnijjũ' eçxthê'ja' tudnijũ txhweteni yuuna, ⁸sa' ixsĩina kaypuba'jya' kasejena naa kiwetewe'sxtxi jxuka, Gog vxite' Magog

txāawe'sxtxi. Txā'wē yūuça puiiya' pkhakhena Magogwe'sx nasatx. Txāawe'sxa' iiméh seena' kuhta' kwetmuse na'wē. ⁹Txāasatx kiwe makwetewa jxuka āhçxáa kxaaduu Dxus luuçtxti vxite' Dxus peeygāani çxhabnawa. Naapkaçxha' Dxusa' cielujū ipx kaahçxa txāawe'sxtxi' jxuka kabku. ¹⁰Sa' eçxthē'j īsxīisa's ipx wala asufxre yakh behna ūsu'k kxteek akhni yuu, na'wē eçx kazxsa Kristo's açesa vxite' Dxus yuwe pta'sxsa na'wēy yuuçxa kaypuba'kh txāawe'sxtxi' akhni yuutx kxtee. Kxteea' en ma'k yuu kus ma'k yuu nawa bagaçxteçxáa yuhwa kaasewa'jmée çxhavxyna nes yuutxna.

Kastigāywa'ja's pta'sxya' kuutxa'jni

¹¹Txajū' jxkaahna u'pni çxihmesa seena' walasa'sthu uy, vxite' kxtee kaççxa u'psa's. Txajx yafxju thegniteçxáa kiwe vxite' cielu wantāimeeçxa jxuka vxitutx, sa' peena yu' vxyaameeta'. ¹²Txajū' uusaawe'sxtxi uythu, walasa ma'k yuu le'çxkwesa ma'k yuu nawa jxuka Dxus tasxte yujuçxa ūste. Aça' librutx phadenitx yuu, vxite' bagaçxte yuhwa uuwa'jmée itxī fxi'zewa'j libru yā'jçxa. Txajū' uusaawe'sxtxi Dxus tasxte kuutxa'jnix yuu, txāawe'sx ma'wē yūuna fxi'zesatewa librote ma'wēne' fxi'jni ūsu' kxtee thegçxa kastigāywa'ja's pta'sxya'. ¹³Yu'khē khēeçxa uusaawa itxī yuuçxa kiitetx, naapkaçxha' kiwe dxiiga pedanisawa itxī yuuçxa kiitetx. Aça' jxukaysatx teeçxsa na'wēçxah ma'wē yūuna fxi'zesatewa pta'sxçxa kastigāywa'jtx yuu. ¹⁴Txajū' uu en vxite' uusaawe'sx yā'jçxa infxierno ipx walate akhnitx yuu. Txāa infxierno ipx walate khēenijū' bagaçxte yuhwa Dxus yakh peena yu' puutx uywa'jme'. ¹⁵Aça' kxteetx akhni yuu bagaçxte yuhwa uuwa'jmée itxī fxi'zewa'j librote txāawe'sx yasetx fxi'jnimeesatxi's.

Cielu u'sesa kiwewa u'sesa uyni

21 ¹Txāa e'su' cielu u'sesa vxite' kiwewa u'sesath uy. Txā'wē yuukahnī nyafxiitey cielu vxite' kiwewa nyafxiiteywe'sxa' skhēwniitx yuu, aça' kīh mar yuhwa meek yuu. ²Juan yaasesa adxa' uythu Dxus çxhab Jerusalem u'sesa txā'wē Dxus tasxu cielujū kijaçte. Txāa çxhaba' seena' ew pheu'jni yu'k, novxia iimi'ya' pheu'jçxa ūythāsna ūs na'wē. ³Sa' cielujū sus na'jīna we'weni wēse'th:

—Mtheg, açxha' Dxusa' nasaa ksxavxyte ūsa' txāawe'sx yakh fxi'zeya', aça' nasa' Dxus jīi yuutxna. Dxusa' txāawe'sx Dxus yuuya' txāawe'sx yakh fxi'zena. ⁴Txāasa Dxusa' kīh nxusniijūwa jxuka nwe'wena, aça' peena yu' uuwa'jmée yuuna. Ū'newa'j enwa pa'jmeena, nxus we'wewa'jwa pa'jmeena, akasawa pa'jmeena, txāa pa'gatey nyafxīi fxi'zeni ena' skhēwku jī'k.

⁵Txajū' jxkaahnite kaççxa u'psa' na'jī'k:

—Mtheg, kīhtxwa jxuka yu'ptheçxa u'seçxaçxáath vxit jxuka jīçxa', ki' na'wēk we'we:

—Na'wē we'wenisatxi' mfxi'j, txāa pa'gatey txā' isa kxtey yuuwa'jsata' jīçxa', 6ki' we'wek:

—Adx we'weni' jxuka kxtey yuunik yuu. Adxa' naa kiwe meetey ūsyā'th yu', sa' bagaçxtewa nes yuuwa'jsath pçuwa'jsamée. Aça' maawa yū'wēesa's kīh yuhwa vxyuu pa'gamée ūsu'nja yu' bagaçxte yuhwa uumée kaafxi'ze'jwa'jsana. 7Maawa ewmeesa yu'sa' nwēese'jmée jxuka knaysawe'sxa' kīhwa Dxus jīi yu'sa' jxuka txāawe'sxçxaçxáa jxpa'gatxna. Aça' adxa' txāawe'sx Dxus yu'nja, naapkaçxha' txāawe'sxa' adx luuçx yuutxna. 8Nawa maa nasawa Dxusa's çxhāçxha yaakxsamée yā'ja' ya'skaçxa fxi'zesa, kīhtewa kazxçxáa yūuna fxi'zesa, nasa ikhsa, kazx pkal yūuna fxi'zesa, dxijxuuna fxi'zesa, Dxus itxīmeesatx neewe'wesa, isxīisa txāawe'sxa' infxierno ipx wala asufxre yakh behna ūsa' kxtee khēeya' u'jwa'j jī'phutxna, bagaçxte yuhwa Dxus yakh peena yu' puutx uyya'mée.

Jerusalen u'sesa's uyni

9Txajū' Dxus angel sietesawe'sx na'wē Dxus kastigo nmeh sietesatx jī'phu'tx siete kopate txāa sietesawe'sx teeçxa' kūhçxa na'wēk we'we:

—Myuh thegya', pta'sxya'wath Piisxakuē jīnisa nyuu yuuwa'jsa's jī'k.

10Naapkaçxha' Dxus Espiritu aphniith yuu, aça' Dxus angela' pe'jna u'kh, teeçx thā'j vxiç seena' wala èete. Sa' kxtee kāhçxa', kaavxya'ja'kh Jerusalen çxhab wala Dxus tasxu cielujū kūisa's. 11Txāa çxhaba' zhiçxkwe zmeena'k kweethna ūsu', Dxus kweethniju. Sa' txāa zmeena' kweethnisa yu' kwet iiméh zhiçxkwe kwentetesa na'wēk yu'. 12Sa' txāa çxhab peeku'j yu' kwetçxaçxáak uphni yu', wala èete jxu'j umnisa, sa' doce vxitxku jī'phu'. Sa' txāa vxitx iisa teeçx angeltxi ūsu'. Txāa vxitxsu yu' Israel jī'j docesawe'sx yasetx fxi'jnix u'pu'. 13Sek kāani ju'gu tekh vxitxtxi u'pu'. Sek khēeni ju'guwa tekh vxitxtxi u'pu'. Sa' thakwe ju'guwa tekh vxitxtxi u'pu', vxite' tasxu ju'guwa kxaz vxitxí. 14Txāa çxhab peeku'j doce kwet ki'pçxa txāa kajkwesuk kwet uphni yu' txāa iisa doce yasetx fxi'jni yu', na'wē Piisxakuē jīnisa jxkaahnisa docesawe'sx yasetx.

15Adx yakh we'wesa Dxus angela' jī'phu'k isani metro vxyuu behçxaçxáasa txāa çxhaba's isawa'j, vxite' kxtee vxitx vxite' txāa kwet uph txā'wēsax isawa'j. 16Çxhaba' puutx txakhweçxaçxáak yu' jxu'jya'wa txakhuēy, tapeya'wa txakhuēy. Aça' Dxus angela' txāa çxhaba's isani metro yakh isate', dos mil doscientos kilómetro jī'phu'k jxu'jya' txakhuēy, tapeya'wa txakhuēy, khēete èetewa txakhuēy, puutx txakhweçxaçxáatx yu'. 17Txajū' kwet upha'sku isa, aça' sesenta y quatro metrok jī'phu' khēete èete. Kwe'sx isani metro jīitha'w txāa yakhíçxáak Dxus angela' isana ūsu'.

18Txāa upha' kwet jaspe yaasesa yakhçxaçxáak umni yu', aça' çxhab yu' vxyuu behçxaçxáak yu', txāasak seena' zhiçxkwe zmeena' vxya'.

¹⁹Kwet upha's kaaçxida!jnisa kwet yuutxi'sa' kwet fxiyfxiy zhiçxkwesa yakhçxaçxáatx pheu'jni yu' txã' naata': nyafxtewe'sxa's, jaspe yaasesa yakh; e'stewe'sxa's, safxiro yaasesa yakh; tekhtewe'sxa's ágata yaasesa yakh; pahztewe'sxa's, esmeralda yaasesa yakh; ²⁰tahçtewe'sxa's, ónice yaasesa yakh; seistewe'sxa's, kornalina yaasesa yakh; sietetewe'sxa's, krisolita yaasesa yakh; oçxotewe'sxa's, berilo yaasesa yakh; nwewetewe'sxa's, topacio yaasesa yakh; dieztewe'sxa's, krisoprasa yaasesa yakh; oncetewe'sxa's, jacinto yaasesa yakh; docetewe'sxa's amatista yaasesa txã'wësa yakhtxi skadni yu'. ²¹Doce vxitxa yu', perlaçxaçxáatx yu', teeçx perlaçxáa teeçx vxitxte äjk yu'. Aça' çxhabte klxiikhun wala yu' vxyuu behçxaçxáak yu', txãasak zhiçxkwe zmeena' vxyaana nes yu'.

²²Kxteea' pkhaakheni dxuus yat uymeeth, txãa pa'gatey kwe'sx Dxus kîhtewa jxuka äjãsa txãa çxhabte jxuka ähçxáak üsu', Piisxakuë jînisawa txã'wëy. ²³Txãa çxhaba' sek, a'te, txã'wësa eena' kweethwa'jsa peejxmeek yu', txãa pa'gatey Dxus zmeena' khikhyni yakhçxáa jxukak eena' kweethe', aça' vxite zmeena' kweethsa' Piisxakuë jînisafiçxáak yu'. ²⁴Maa kiwetewe'sxwa Dxus nwe'wenisa' txãa çxhab eena' kweethnisu fxi'zetxna, aça' maa jxkaahsawe'sxwa txãa çxhaba's weçxana wala tuuthe'jetxna. ²⁵Txãa çxhabte vxitxa' maa enteçxáa yuhwa aphni yuumeena, txãa pa'gatey çxhi'dxwa'j enwa méé yuuna. ²⁶Kxteea' wala yuh txãa çxhaba's weçxana tuuthe'jetxna maa kiwejüwe'sxwa. ²⁷Nawa kazxa yu' kîh yuhwa u'kameena, ahçena îsxîisa kîjkihwa ewméé yüusa. Naasáa Piisxakuë jînisawa libru ji'pha' txãa librute txãawe'sx yasetx fxi'jnisa yuuçxáa u'katxna bagaçxte yuhwa uuwa'jmée îtxî fxi'zewa'jsa.

22 ¹Txajü' Dxus angela' teeçx yu'wala seena' zhiçxkwe çxihme atesa's pta'sxku, bagaçxte yuhwa uumée kaafxi'ze'jwa'jsa's. Sa' txãa yu'a' Dxus jxkaahna üsni vxite' Piisxakuë jînisawa txãawe'sx jxkaahna üsnijük kasehna üsu'. ²Çxhabte klxiikhun walasa pxãhte vxite' yu'wala pukate puutx pdxi'p fxtüutasx buçxaçxa walaana kãhtx, bagaçxte yuhwa uumée kaafxi'ze'jwa'jsa. Sa' txãa fxtüutasxa' a'te iisak yünna nes yu', txãasak anxute' doce weces yünnu', naapkaçxha' eç yu' yu'çek selpi' maa kiwejü nasatxwa jxuka. ³Kxteea' ewmeesa yu' kîh yuhwamée yuuna. Txãa çxhabte' Dxus vxite' Piisxakuë jînisawa txãawe'sx jxkaahna üsutxna, naapkaçxha' txãawe'sxtxi selpisaawe'sxa' weçxana neewe'wena nes yuutxna. ⁴Kxteea' Dxus yakh pdxi'puçxa puutx uyya' äjãtxna, sa' Dxus yase's txãawe'sx dxikthesu ji'phsa yuutxna. ⁵Kxteea' çxhi'dxwa'j enmée yuuna, aça' kxtee fxi'zesa' pki'tawa'jwa peejimeetxna, sa' sek kweethniwa peejimeena, txãa pa'gatey eena' kweethsa' Dxusiçxá'. Aça' kxtee üssa' bagaçxtewa weçxana nes yuutxna.

Jesuskristo kîiwa'j en utxa üsa'

⁶Txajü' Dxus angela' adxa's na'jînak we'we:

—Na'wẽ pta'sxnisa' isa kxtey yuuwa'jsata', aça' txãatxi's isasa yuhtxna sũhna wa'lmée jxpa'gawa'ja'. Txãa pa'gatey nyafxí txajx yuwe's pta'sxsawe'stxi kaaũusuthe'kh txãa Dxus íçxáak açxwa txajx angela's kaah, na'wẽ kĩhwa yũuya'wa' jwee yu' jxthéeyuumée txãatx kaajiyu'khan açxh naa ensu selpisaawe'stxi.

⁷Txajũ' Jesus we'weçxa':

—Txaçxmey yuwe'nja, aça' naa librute Dxus yuwe's fxi'jni ũsta' txãatx kxtey yũusa' seena' weçxana neeyũutxna jĩ'k.

⁸Juan yaasesa adxa' txã'wẽsatxthu uyna wẽse'jna yuu. Sa' txã'wẽ uyna wẽse'jçxa', Dxus angel kaavxya'ja'kh txajx tasxte peejxũkweh neewe'weya'. ⁹Nawa txãa yu' na'wẽk we'we adxa's:

—Adxa's peejxũkwenu. Adxa' idx na'wẽysafíçxáath, iidx yakhthẽ'jwe'sxwa ma'wẽta Dxus yuwe's pta'sxna fxi'ze' txã'wẽsath, vxite' Dxus librute fxi'jni ũsa' txã'sna kxtey yuusawe'sx na'wẽysafíçxáath Dxusna selpisáa. Aça' wejxwa Dxusnaçxáa mneewe'we jĩ'k.

¹⁰Txajũ' ki' we'wek na'jĩna:

—Naa librute Dxus yuwe's fxi'jni ũsa' txã'sa' pta'sxmée yu' yuunu. Txã'wẽme' kxtee we'wenisa kxtey yuuwa'j en añxa'wa'. ¹¹Aça' txãa en añanijuyã'ja', pta'sxni's nwẽese'jsamée yu' jweeíçxáa ewmée kazx yuuna fxi'zetxna, naapkaçxha' pta'sxni's nwẽese'jsa' jweeíçxáa Dxus yakh txutemée çxhãçxha fxi'zetxna.

¹²Txajũ' Jesus ki' we'weçxa':

—Txaçxmey yuuyuju'nja. Sa' teeçxsa na'wẽçxah kĩh yũuna fxi'zesatewa txã'wẽ fxi'zepa'ga deweni's jxũçxa yuwe'nja. ¹³Adxa' naa kiwe meetey ũsyã'th yu', sa' bagaçxtewa nes yuuwa'jsath. Adxthu nyafxte ũsya' takh, sa' jxuka skhẽwtewa adx íçxáa neeyũuwa'jsath pçuwa'jsamée.

¹⁴Maawa athni rop'a's yaateçxa jiphsa yakha' wala yuh weçxa yuja', Dxus çxhabe vxitxte u'kaçxa kxtee fxtũutasx bagaçxte yuhwa uumée kaafxí'ze'jwa'jsa's ũ'ya' u'kasa yakha'. ¹⁵Nawa kazx ewmeesawe'sx, dxijxuuna fxi'zesa, kazx pka' yũuna fxi'zesa, nasa ikhsa, Dxus ítxĩmeesatx neewe'wesa, kíhtewa jxuka ísxĩwa'jçxá's yajkxna fxi'zesa txã'wẽ yũusawe'sxa' u'kaya' añjameeçxa ekaju neeyũutxna.

¹⁶Jesus ki' we'weçxa': Adxa' adx tasxte selpisáa angela's kaath, Dxus luuçxwe'stxi txã'wẽsa's jxuka pta'sxkahn. Adxa' nyafxte'wẽsath, sa' jxkaahsa Davxid jĩ'the kasehsath. Sa' khikhĩçte estrelxa zhiçxkwe eena' kweethsath jĩ'k.

¹⁷Aça' Dxus Espiritu vxite' Piisakuẽ jĩnisa nyuu txãawe'sxa' pi'ki'tx:

—Myuh jĩna.

Aça' txã'wẽ pi'kxni's wẽse'jsa' jweeju mpa'yawe. Aça' yũ'wẽesa' utxaaçxa mpa'gawe yu' bagaçxteçxáa yuhwa uuwa'jmeete kaafxí'ze'jsa's, kĩh yuhwa vxyuu pa'gamée.

¹⁸Dxus yuwe naa librute fxi'jni ũsa' txã'sna nwẽese'jsa jxukaysatx adxa' na'wẽth yu'kxpeje': Dxus yuwe naa librute fxi'jni ũsa' txãate

kīhçxáawa yutxawáatxna açá' txã'wẽ yūusatxi's na'wẽ naa librute kastigo fxi'jni ũsta' txãatx jxpa'gawa'j vxituna Dxusa'. ¹⁹Meeçxawa Dxus yuwe naa librute fxi'jni ũsa' txã'sna kīhçxáawa ivxiituwáatxna açá' txã'wẽ yūusatxi's Dxusa' puuçmeena txãa fxtūutasx багаçxte yuhwa uumée kaafxi'ze'jwa'jsa's. Sa' na'wẽ pta'sxna fxi'jni yuuk txãa çxhabetwa ka'ga'jmeena.

²⁰Txã'wẽ yūuwa'jsa' na'jī'k:

—Txaçxmey yuuyuju'nja jīte', passa':

—Txã'jīwaççxáawa, wēt yuuna. Nawa dud myuh, Jesus.

²¹Kwe'sxtxi jxpe'jsa Jesukristo' i'kwe'sx jxukaysatx pu'çxhina.